





國朝金陵通紀

江寧司馬允寬題

四二八

門 儿 5
號 2998
卷 4

光緒丁未年
瑞華館棊印

昭和九年
四月二十八日
購末

敘

吾友陳君伯雨撰金陵通紀既成復自

國朝順治二年起至同治十三年止爲

國朝金陵通紀草創於光緒辛丑在

朝廷試行新政之年成於光緒丁未則

朝廷預備立憲之年此數年中

朝廷銳意自強事事改絃而更張之上下氣象幡然一變於是廢科舉開學堂
士之冀速化者束十三經廿四史不觀一鄉一邑往往數典而忘其祖陳君獨
日夕治是書久且勤丹黃粉墨圖籍之屬排比几案手鈔蠅頭小字累千紙既
蕝事問序於余余受而讀之凡

國朝二百餘年之深仁厚澤賢有司之教化鄉人忠義孝弟節烈之行旌於
朝廷者一開卷燦然大備而敘

南巡盛典及咸同以來兵事尤詳夫

敘續

南巡當重熙累洽豐亨豫大之日六飛所莅萬眾歡呼
天章宸翰至今摩挲碑石猶有存者視古巡方告嶽之禮無以過兵事則江漢
常武之烈中興諸將帥實再造吾民旋定安集之今距是書斷手之歲又十餘
年矣運會風尚日新月異而彼蒼眷顧未厭周德自今以往幸遇
右文稽古之世

朝廷昌明正學召海內耆儒備蘭臺石室之選陳君以大臺被蒲輪之徵必益
抒所蘊潤色鴻業豈僅廣續通紀一書為梓桑龜鑑也哉吾鄉方急科學願質
之能讀是書者光緒戊申春王正月上元秦際唐撰於南岡之寄生居時年七
十有二

國朝金陵通紀卷一

江甯陳作霖伯雨編輯

大清世祖章皇帝順治二年夏五月豫親王多鐸平江南駐通濟門以大中橋
河為界東為兵房西為民房二十七日王謁明陵命靈谷寺僧修理二十八日
王出南門至報恩寺行香觀者如堵 詔改明南京為江南省城命內院大學
士洪承疇總督軍務經略招撫江南各省地方往駐焉 降明應天府為江甯
府以前府尹李正茂知府事所隸各縣如故時百務草創一無成規正茂蒞任
數年抑豪強禁羅織定賦則絕竿牘建設衙署修利涉石城上方諸橋竭力經
營不辭勞費士民久而思之 時令各縣設鎮兵以防土賊溧水知縣羅佳士
察溧人淳樸請毋煩設鎮以增騷擾上官許之六合瀕江流亡尤甚知縣劉慶
連勞來安集四境熙然 秋七月貝勒克德渾拜平南大將軍來代豫親王
王遂還京以土國寶為江甯巡撫尋移駐蘇州 設鎮國公一員撫國公一員
領旗兵駐防江甯 遣內官正副二員陵戶四十名守明孝陵 恩免江南本

年稅糧十之七兵餉十之四明季無藝之征悉罷之 土賊王聘徵嘯聚於赭山副將彭永琦擒斬之 冬十月明義軍吳漢超等帥眾連取句容溧水高淳等縣尋敗退操江某挾嫌以徹兵之故下溧水知縣羅佳士於獄置諸法民咸冤之 是月舉行鄉試以大名成克鞏潛山劉肇國為考官取中上元史象晉李楨謝觀江甯路汝捷李廷樞郭亮彭文煒高翺張如璿蔣怡陸本徐惺胡禹冀句容王自新溧水李蔚高淳唐懋淳六合李敬汪匯凡十八人 十一月貝勒勒克德渾進討湖廣以甲喇章京巴山梅勒章京康額賴為左右翼同洪承疇駐防江甯 明中書舍人盧象觀奉宗室朱盛瀝起兵茅山偽稱瑞昌王據 麟紀年東華錄 以象昇故將陳坦公為先鋒謀襲江甯有朱君兆者奇士也獻計曰南京雄深未易拔況北兵四面萃我敗道也蓋謀內應者乎城中之豪素與君兆習願為君先入定期告我從中以火為應已而遣僧詣君兆定期僧乃叩大營告變焉

三年春正月十二日經略洪承疇遣左右翼巴山康額賴捕斬朱君兆及同謀者三十人而朱盛瀝等不知也十八日盧象觀等率眾二萬餘三路入犯承疇伴舉火神策門為號而分兵先出太平朝陽二門旋啟神策門出鐵騎衝之外軍駭散盛瀝匿水竇中以免復收殘卒攻溧陽又敗遂亡入太湖 罷江南省舊設部院以軍務方殷乃特差在京戶兵工三部滿漢侍郎各一人駐江甯分理 二月侍郎巴山梅勒章京張大猷奉 命鎮守江甯 改設昂邦章京一員領旗兵駐防 明唐王督師大學士黃道周被執至江甯繫故尙膳監洪承疇往見之道周佯驚曰承疇死久矣焉得尙存此無籍小人冒名耳拒不見在館與門人講習吟咏如常屢遣諭降不屈三月壬子押赴市曹過故宮東華門坐不起曰此與高皇帝陵寢近可死矣既見市有樹福建門牌者指曰福建吾君在焉死於此可也南嚮再拜受刑 秋八月補行鄉試掖縣張端安邑呂崇烈來為考官取中上元劉思敬朱之翰吳調元江甯史允琦錢穀葉舟句容陳繩舜凡七人 九月朱盛瀝潛行至茅山匿民舍中捕得殺之 時東南甫定賦役不均吏胥多上下其手以漁肉鄉民溧水知縣楊國楨泣事廉明兼長武

略兌運漕糧親臨倉所與運官運役爭執升合民困以蘇江浦知縣高爽收糧徵稅亦革除耗羨焉

四年改經略招撫爲總督轄江南江西河南三省以馬國柱爲之時八旗駐防兵與民不相習國柱盡心撫戢令行禁止兵民乃安江甯知府林天擎亦廉公有威凡滿漢訟事片言折之輒心服而去六合冶山妖道惑眾立擒之歲祲分設粥廠活饑民二百餘萬人 是歲丈量田畝奸民率思借爲訟端溧水知縣王鼎允遇有告許隱糧者概置不究待胥吏尤嚴清算財賦纖毫不能相欺高涓知縣崔掄奇以湖田虛糧爲民累亦力懇上官疏請永折從之

五年秋八月梁清寬傅維麟主試江南取中上元蔡祖庚張延基江甯宗章竣陳嘉善楊士元王仕雲黃康成何采旬容楊元勳胡允李汴筮祖齡江浦丁峻飛凡十三人

六年建駐防城 改總督轄江南江西二省 溧水分防兵肆虐至有殺人以祭馬神者知縣安應睟力請徙之親練鄉勇以爲衛

七年春一月乙未改明國子監爲江甯府學應天府學爲上元江甯二縣學

裁江甯府馬政船政同知二員奉天趙廷臣爲江防同知實轄運務漕督欲以黃快船丁僉充運丁廷臣不可請於當事乞循舊冊各歸其幫運衛得無擾又優卹士子凡諸生皆復其父兄子弟概不僉運兼攝江甯府事查核積弊見丁糧多少不均悉行釐正當堂編審胥吏無所肆其飛詭遠邇頌仁明焉

八年 詔准高涓歲輸漕糧一萬六千八百五十石改徵折色著爲例 秋八月高珩黃機主試江南取中上元梁楣徐珏夏允聯程邑王萬象江甯王炎蔣士璋周而涓吳儀濤王鉉王瑀白夢鼐楊晉王澄句容張芳潘淵筮重光李挽河高涓吳會璋凡十九人 是歲荒祲流亡相繼糧額莫辦上元知縣郭士賢請將各院罰贖銀兩盡數糶米入倉不足則以己俸益之民力不困而國儲亦充 江浦知縣劉天澤建彰賢育才坊於學宮前

九年總督馬國柱增修江甯府學立櫺星門及戟門改彝倫堂爲明倫堂設志道據德依仁游藝四齋以國子監坊爲江甯府學坊

十年提督學政藍潤捐修句容學宮及文星樓時按試江甯府屬生童在句容也 溧水里糧多寡不齊每遇徭役按里分派知縣閔派魯親為編審勒成一書日均里平徭冊又高澹知縣紀聖訓以邑工河工輕齎之征詳請免銀三千兩民共頌之

十一年春正月辛丑以水旱故 詔停江甯織造二年戊申免江甯去年被災額賦 二月明定西侯張名振率眾自海沂江而上掠儀徵進至觀音門還登金山望祭孝陵江甯大震 秋八月姜元衡馬華曾主試江南取中上元程瀚王作礪鄧士傑史樸江甯周道泰謝沛句容朱朝幹溧水王芝藻李同亨陳宿高澹徐寅凡十一人

十二年溧水知縣閔派魯以縣西南濱湖田嚙於水者十萬餘畝民苦虛賦明季兩經改折後復徵本色閭里益不支力請上官得復改折著有復折全書十三年夏閏五月郎廷佐來為總督 裁江甯府督鑄同知一員 句容溧水重建學宮成

十四年秋八月方猷一作猶錢開宗主試江南取中上元錢天子江甯程桔吳樹

聲楊兆皋江蕃林大節溧水湯聘高澹陳珍凡八人旋以作弊事發冬十月

都統卓爾泰東華錄作趙布泰副都統莽吉圖富喀等駐防江甯 是年頒賦役全書

於江南

十五年裁江甯府糧捕鹽捕查鹽各通判仍留南捕一員增設北捕一員

十六年春明延平王鄭成功偃強海上謀犯長江江甯警報踵至城中居民多憂糧匱左布政使陳培楨請開聚寶門聽民運米入城眾心始安又防兵多執民為賊謀及仇家誣陷者冤獄迭起按察使姚延著悉辨出之後竟以此事被誣坐死

夏六月海師蔽長江而上壬子陷鎮江提督管效忠戰敗走江甯遂下六合秋

七月庚申朔掠江浦知縣許立運東華錄作達典史蔣上達皆死之張煌言率所部

至蕪湖高澹溧水俱迎降江甯遂戒嚴丙寅海師薄觀音門昂邦章京額額木恐城民通賊將屠之總督郎廷佐邀其夜行察民間雞犬皆無聲事乃解因飛檄崇明總兵梁化鳳入援戊辰成功率眾由儀鳳門外登岸軍於白土山令諸

舟一字列於江東門外使馬信黃昭蕭拱宸營於旱西門以連林明林勝黃昌魏雄楊世德之壘使陳鵬藍衍蔡祿楊好屯東南角依水爲營劉巧黃應楊正戴捷劉國軒屯西北角傍山爲營又使張英陳堯策林習山屯岳廟山連諸宿鎮爲成功大營護衛設鹿角望樓深溝木柵而留甘輝余新屯白土山前當兵衝萬禮楊祖屯第二大橋山翁天祐屯儀鳳門之要路 乙亥我師以千騎薄余新營而敗城中益懼操江朱衣佐自海師營逃歸言於郎廷佐曰海賊眾不過數萬船不過數百請卑詞寬限以驕其志乃遣人說成功曰我朝有例守城過三十日罪不及妻孥乞寬三十日之限成功恃其累捷許之但命八十三營牽連困守以待其降釋戈開宴縱酒捕魚爲樂庚辰有閩人林某來言二十三日爲成功生辰諸將卸甲飲酒乘之可破且請爲導會梁化鳳自崇明繞道至與城守聞之夜穴神策門引五百騎突犯余新營海師出不意驚潰新敗入蕭拱宸營化鳳乘之拱宸亦敗遁新被禽翁天祐馳救之而化鳳已收兵入城矣我師旣勝乃盡出騎兵列城外甘輝潘庚鍾勸成功退屯觀音門以圖再舉

成功不可調姚國泰楊祖藍衍楊正屯山上甘輝張英伏谷內林勝陳魁列山下陳鵬蔡祿往來接應倉卒移帳營壘未成壬午質明化鳳率驍騎薄楊祖營祖奮力迎戰三合三卻楊正姚國泰敗走藍衍戰死山高行遲陳鵬蔡祿救之不及而化鳳已從山上馳下突之鵬祿軍亦大潰總督廷佐時方巡城望見固山額真哈哈木梅額章京噶福哈兵少卻大驚急麾勁騎自鍾阜門出繞至成功大營之後俄見山上旗喜曰吾家兵上山勝矣兩軍旣合乘勝掩殺海師營壘咸搖動成功在山上觀戰見蔡祿等敗屬潘庚鍾曰爾立蓋下代吾指麾吾往催水軍也駕船至江心望諸軍披靡不堪乃飛帆去庚鍾揮劍督護衛戰至死不去其蓋陳魁聞成功營被圍趨救之亦中箭死眾軍無主遂大奔甘輝張英在谷內不得去英戰死輝馬躓被獲至金水橋不屈斬之萬禮力戰於大橋山亦覆沒癸未江甯之圍乃解方化鳳之穴城也有以通賊報總督者廷佐曰梁將軍忠勇必無是事其有謀乎旣收軍迎而勞曰前夜穴城出何不相聞也化鳳曰成功積寇瓜鎮新亡人心搖動桀黠之徒多有異念保無城內爲之偵

探者乎不請命者懼洩兵機耳所以出其不意攻其無備也又城下掘地見碑曰若要神策開除非化鳳來至是果驗事聞化鳳擢江南提督改神策門爲得勝門 巡按韋某奏六合拒兵獻城 詔釋不問而民心洶洶訛言四起知縣莫北哲盡心拊循招徠黎庶修葺城池四境乃安

十七年重建駐防城起太平門東至通濟門止 詔改昂邦章京爲駐防總管 秋八月譚篆謚名臣主試江南取中上元朱英江甯阮彝溧水蕭秉晉高淳孫謙孫奏凡五人 是歲洪若皋重建方正學先生祠

十八年 詔改駐防總管爲將軍 高淳知縣孟復生建尊經閣 六合饑知縣顧高嘉以便宜發倉振給又編畝考租多寡按實民以不困

聖祖仁皇帝康熙元年 詔裁操江都御史歸併總督兼管

二年秋八月王勗王日高主試江南取中江甯胡士著阮士鵬陳菁溧水李銘謝文運任文煒凡六人 溧水妖婦曹氏以邪教惑眾知縣饒應元請於上官殲之又審定戶役三十八名爲一排兩石爲一丁科徭之輕重始均

三年 詔改總督專轄江南省

四年

五年夏六月 詔免上元江甯等衛節年未完黃快丁銀 秋八月徐旭齡鄭秀主試江南取中江甯陶敬黃其代羅秉倫句容戎正中王復中溧水趙統凡六人

六年裁江甯府推官一員 江南按察使章秉法修復明道書院立射圃以教士設水龍局以救火災 江甯知府陳開虞修江甯府志延鄧旭白夢鼐爲纂修 時議改高淳賦折徵本色民心驚擾知縣張大垣力請乃已又除本縣雜徵及詳減漕費千金眾力以紓繼之者爲李斯佺痛除積弊拘蠹民之尤者杖斃之餘黨斂迹拔知名士月課於寅賓館文教以興後又有張象翀愛民禮士不染一塵士民控革里排爲籲於上官見許是皆有大造於高淳者也

七年冬十二月麻勒吉來代郎廷佐爲總督

八年秋八月蘇銓祁文友主試江南取中上元貢琛江甯葉炳吳履聲高淳史

秉直陳悅旦凡五人 冬十一月 詔免江甯被災額賦

九年設育嬰堂於三山門外與養濟院同宇

十年夏五月兵丁侯進孝許告總督麻勒吉被逮江南士民羣集鼓廳保留之

江南旱蝗總督麻勒吉仿古埋蝗之法捐俸購買遠近負戴而至哺子遂絕

歲不告饑 冬十一月 詔免上元被災額賦

十一年六合知縣常在改建學宮明倫堂構講院於老梅菴聚知名士會課之

十二年夏六月麻勒吉降調阿席熙來代為總督 高淳學宮災 冬吳三桂

反於雲南警報至江南民心擾動

十三年春正月 詔江甯將軍額楚鎮海將軍王三鼎各遣兵防守安慶副都

統馬哈達分領兗州官兵往江甯與額楚同守 二月 詔馬哈達將京兵移

駐安慶其察哈爾左翼官兵自兗州赴江甯歸將軍統轄 夏四月耿精忠反

福建 詔副都統胡圖率江甯滿兵馬哈達率江甯左翼察哈爾兵援杭州移

安慶右翼察哈爾兵守江甯 是月揚威將軍阿密達率京兵來鎮江甯 壬

午 詔駐紮江甯副都統喇哈率京兵赴浙副都統穆赫林領喀喇沁土默特

兵千名赴江甯聽阿密達管轄 六月庚戌 詔駐紮江甯副都統紀爾他布

率察哈爾全軍赴浙駐紮兗州副都統巴爾堪率蒙古兵赴江甯聽阿密達管

轄 時康親王傑書赴浙 詔過江甯時將蒙古兵一千名留駐更調駐守江

甯喀喇沁土默特兵隨行尋因衢州告急二部先往副都統蘇朗率蒙古兵留

鎮江甯 秋九月婺源告警 詔江甯將軍額楚副都統巴爾堪率兵往援副

都統碩塔穆森以鎮守兗州移駐未至改援祁門 詔副都統雅賴阿喇尼速

赴江甯 已卯 詔授簡親王喇布揚威大將軍率滿漢兵往江甯保固江南

全省 王輔臣反於陝西 詔鎮守江甯將軍阿密達率護軍四百名赴西安

冬十二月 詔平寇將軍哈爾哈齊鎮守江甯并參贊大將軍軍務

十四年秋七月 詔簡親王率江南兵二千赴江西駐充副都統額赫納率盛

京烏喇兵一千速赴江甯交哈爾哈齊管轄尼滿雅署副都統往參贊平寇將

軍軍務 八月孫昌期勞之辨主試江南取中上元王瑞江甯何允謙陳公球

汪燮陸史凡五人 冬十一月 詔尼滿雅秦揚古統江甯盛京烏喇兵一千
赴江西駐充副都統科爾科代率蒙古兵六百名移屯江甯更發禁旅每佐領
二名同往俱聽哈爾哈齊管轄 時滇閩不靖江浦地當孔道供億浩繁知縣
洪承龍一身任之不以累民年荒煮粥振饑暇日則進士之俊秀者課之先是
有徐龍光者莅是縣百廢具舉縣人刊玉浦治音二卷頌其德政後又有郎廷
泰甫下車即斃豪惡於杖下刑名錢穀釐剔井井胥吏無所容其奸卒官眾爲
建世德祠以祀之 高淳知縣劉澤嗣重建學宮創育嬰會民不勞而事舉
是歲立簡親王功德碑於三山門外 今名其地爲王家碑亭
十五年春二月廣東告急 詔哈爾哈齊率江甯每佐領驍騎兵一名蒙古兵
六百名前往以充州每佐領驍騎兵一名蒙古兵七百名調赴江甯令科爾科
代用平寇將軍印代鎮 夏四月尙之信反廣東 詔調大將軍圖海所領盛
京兵一千名及充州每佐領驍騎兵一名遣赴江甯令將軍華善用平寇將軍
印統轄以學士陸海副都統科爾科代參贊軍務 六月南安告變 詔副都

統額思赫領江甯蒙古兵七百名赴江西 是歲旱

十六年秋九月 詔和碩額駙華善學士陸海率江甯所有盛京兵三百名自
京撥往漢軍兵三百名赴江西以平寇將軍印留付副都統科爾科代管理江
甯軍務 沈上塘趙士麟主試江南取中上元馮從雲江朝宗倪燦江甯張斗
方宜巖范儼叢克敬高清葛長祚凡八人 是歲因軍興開科江西湖廣皆附江南九月乃試 時兵革
未息荒旱頻仍溧水毘連皖南民情騷動知縣趙世臣苦心調劑催科不擾眾
恃以安

十七年秋八月熊一瀟李迥主試江南取中上元潘應恆史作弼徐元貞周藻
江甯阮樾句容趙昌祚溧水趙律凡七人

十八年冬十二月 詔免江南旱災額賦

十九年江甯知府陳龍巖修府學文廟兩廡

二十年夏四月裁江甯府船政同知一員 秋八月馮雲繡朱彝尊主試江南
取中上元胡任輿金鉉句容王鵬六合曾必光凡四人 冬十二月 詔免六

合被災額賦 是歲雲南平各省皆徹防

二十一年春正月復改總督轄江南江西二省以永甯于成龍為之甫莅任卽禽斬巨盜魚壳好微行人見白須偉貌者羣相指目南中風俗奢靡聞成龍至則爭衣布褐布價驟貴士民有懽笑無絃管游惰不空手櫃坊無鎖鑰又建虹橋書院擇高才生講習其中

二十二年江甯知縣佟世燕纂修縣志延戴本孝主其事又修水次倉於觀音門 冬十月祭酒王士禎請飭督撫查明南監板令學臣收藏儒學尊經閣從之 江甯知府漢軍于成龍與總督同名開濬府學泮池築屏牆時瀕江蘆洲多為豪強所占成龍徧行查察以有課而無洲者為坍江立于豁除有洲而無課者為欺隱升科而薄其罰人皆稱平後此守江甯有名者為施世綸聞有錢道婆居武定橋以幻術招致男女往來皆以夜乃捕寘諸法及丁艱去攀留者數萬人不得請則人投一錢建雙亭於府署名曰一文亭

二十三年夏五月王新命來代于成龍為總督 秋八月徐潮楊周憲主試江

甯取中上元陸遇龍吳標程紹伊江甯曹新里句容駱鳴騶凡五人 秋九月

詔免明年江南漕糧三之一 冬十一月

皇帝南巡至於江甯以將軍署為行宮初登雨花臺觀城郭山川形勢作過金陵論已又升觀象臺望玄武湖題亭額曰曠觀過舊內作懷古詩癸亥遣內閣學士席爾達祭明孝陵甲子駐蹕大教場校將軍以下官射

皇帝親射右發五矢皆中左發五矢四中士民觀者以數萬計皆踴躍歡呼是日復親謁明孝陵申命督撫防護 賜江甯知府于成龍手卷一軸及返蹕官紳士民於儀鳳門跪送 御製夜泊燕子磯詩遂啟鑾

二十四年

二十五年冬十一月 詔免六合蝗災額賦

二十六年春三月董訥代王新命為總督 秋八月米漢雯龔章主試江南取中上元趙建中江甯沈傳句容吳源懋高世傑王昌學宣芸沈文崧溧水邵衡高滄王傑凡九人 冬十月宋犖來為江蘇布政使 冬十一月 詔蠲明年

應徵地丁錢糧及本年未完租賦

二十七年春三月 詔免康熙二十七年以前江南漕糧 夏四月傅拉塔代

董訥爲總督 六月旱江浦知縣陳君恩設壇雩祭躬親露禱不避風日越夕

甘霖大沛及解任諸生成溼等有去思詩

二十八年春正月 詔蠲江南積年民欠及一切地丁錢糧 二月癸亥

皇帝二次南巡至於上元以吉祥街織造署爲行宮甲子躬祭明孝陵過故宮

作詩 賜守陵人金又 賜江甯駐防男婦年六十以上者金乙丑幸教場校

官兵射因 賜文武將士宴有詩已而登觀象臺與大學士李光地張玉書論

天文作望後湖詩又登報恩寺浮圖作詩及將返蹕江甯士民羣詣行在爭獻

米穀蔬果泣涕請留屢 諭不止乃俯徇億兆之願勉遲信宿之行作詩示之

於是總督傅拉塔奏請免江甯號房蓬搭地租銀八千兩定上元江甯爲大學

額各二十名皆蒙 俞允三月戊辰朔回鑾

二十九年秋八月王尹方裴養主試江南取中上元朱元英陸緝宗江甯馮瑄

羅光忻車鼎晉凡五人 時江浦風俗僻陋士氣不振知縣甘國埏政簡刑清

留情文藝下皆化之 冬十二月 詔免六合水災額賦

三十年 詔蠲江南歲運漕米以次逐府各免一年其江甯截留十萬石存貯

駐防倉

三十一年冬十二月 詔免六合旱災額賦時知縣吳重光遷學宮於東門建

書院於龍池錢糧煩雜定限截票便民輸納詳革加增屯米善政爲多

三十二年夏瀕江水溢秋 詔免六合本年額賦 八月李錄子強兆統主試

江南取中江甯郁瑞叢澍龔鐸句容張廷超王世興溧水王元衡李舒春江浦

劉巖金鏗高溍王孚凡十人

三十三年夏六月總督傅拉塔卒於位士民立祠雨花山以祀之與前督麻勒

吉祠相望 范承勳來爲總督 冬十月江甯廠船政改歸管糧同知兼理

詔免江南舊欠帶徵錢糧

三十四年六合學宮成面臨滁河地頗雄秀

三十五年秋八月張明
徐上葉佳董基寅易裕
詔免上元水災額賦

三十六年
三十七年冬十一月張
三十八年夏四月己酉

皇帝三次南巡至於上
錢糧及三十四五六等
陵王子親往奠酒作過

治隆唐宋額將返蹕日
署兩江總督 秋八月
徐斌蔡復江甯吳延燠

十一人
元駐蹕吉祥街行宮
年一應地丁雜稅

明太祖陵有感詩遂
夜登燕子磯有詩
張廷樞姜繡主試江

劉王孫句容李無
來為兩江總督

弼黃鼎楫主試江南
自超劉朝講江浦林

元駐蹕吉祥街行宮
官兵及貧民遂啟行

四十二年春二月辛丑
皇帝四次南巡至於上
賞各官有差並賚駐防

四十三年
四十四年夏四月

皇帝五次南巡將至兩
以不得餽置穢物簞席
英力稱之事乃解途經

祥街行宮丙戌遣尙書
徐潮祭明孝陵 幸

江總督阿山惡江甯
閒會致仕大學士張

寶華山因往遊焉
記卷一續

上元朱士履蔡登王元衡江甯
浦金樾凡十人 冬十二月

偶述詩 詔免江南舊欠帶徵
戍遣兵部尙書肅爾達祭明孝
壇演武場閱兵甲寅命修明陵題

五月命張鵬翮扈從入京以陶岱
甫取中上元鄧輝張秉亮王防中
嚴容溧水黃紹琦高信孔毓儀凡

中上元王霖王粵周天成范仁
正凡八人

日遣大學士馬齊祭明孝陵陞
是歲錢鈺改建方正學祠

府陳鵬年兼使主龍潭行宮或
出迎 駕召見問鵬年守官狀
製有詩乙酉入江甯城駐蹕吉
武場閱江甯官兵射是月適逢

萬壽盛節士民恭進 御饌命翰林學士揆敘試士於秦淮棘院各賦詩二章取錢崇世等五人 御製貢院考試歎旋頌接統濂溪額於明道書院欣然有得額於朝天宮又書訓忠堂額 賜前工部尙書熊一瀟書兩江遺愛額懸傅拉塔祠時江干疊石為步備 車駕觀水師前期一日阿山始檄陳鵬年為之人皆為之危鵬年率子弟躬運土石士民從者屬路詰旦步成未嘗愆期焉庚寅 車駕啟行過明孝陵自東角門入 諭諸臣曰非爾等導引有秩特朕之敬心耳遂率諸皇子及大臣侍衛等行禮辛卯次鎮江府 江甯知府陳鵬年性清廉在官不受一錢羣商歲供數百金市芻米給幕士又嘗逐十三樓娼而以其地懸 上諭月吉講讀即今講堂大街為南市樓址 秋七月總督阿山遂據此劾為大不敬落職聽勘檄下未逾時士民填街巷揭帛鳴鉦環總督署問被劾之由久之乃定鵬年卒以是去官 八月王之樞廖騰燿主試江南取中上元黃越王玉瑞江甯徐學詩張珏六合汪泖民凡五人 時江浦知縣董志建力行惠政不事虛飾歷七年如一日

四十五年春正月 詔免上元江甯四十三年以前未完地丁銀米其已完在官者準本年流抵 江甯織造曹寅捐修府學 冬十一月邵穆布來為兩江總督

四十六年春三月己未 皇帝六次南巡至於上元駐蹕吉祥街行宮庚申遣馬齊祭明孝陵辛酉幸小教場閱江甯官兵射壬戌親謁明孝陵至大門下輦由東陞升殿江蘇按察使張伯行來見褒為清官又 御書朱子詩賜上元知縣趙聯捷 恩賚耆老帛肉有差 詔免四十七年額賦遂啟蹕行 夏早上元知縣趙聯捷挑浚河道以工代賑又以青龍山為金陵來脈民多采石其閒力為禁止 冬十二月詔免上元本年旱災地丁錢糧

四十七年春正月 詔留湖廣江西漕米四十萬石於江甯等處平糶 秋八月王景曾屠沂主試江南取中上元陳昌會楊化光方式濟江甯章彭齡凡四人 冬十月 詔免江南明年地丁額賦并停徵舊欠

四十八年噶禮來為兩江總督
四十九年

五十年秋八月左必蕃趙晉主試江南取中上元吳允試陸衢燕詔
殷文煥夏廷宣句容王兆麟江浦鮑準金世綽凡九人是科有謠言
兩目無珠趙子龍一身是膽為江蘇巡撫張伯行所劾晉自經於獄
噶禮以受賄解任郎廷極來署兩江總督

五十一年冬十月赫壽來為兩江總督 十二月 詔免江南明年
除歷年積欠 是歲建考棚於江甯為下江士子秋闈錄科之所
魏世泰建書院以課士

五十二年秋八月新安呂履恆猗氏喬雲名主試江南取中上元牛
春錢宏孝黃永耀江甯沙廷柏蔡桐吳啟昆艾之駿錢芳朝車敏來
伏授蔣濟川溧水尹正肅高淳王汝與凡十五人 江浦知縣梁允
宮六合亦築奎壁樓於文廟側

五十三年秋八月南城梅之珩睢州湯之旭主試江南取中上元孫
孫元郭鼎臣朱毓芳江甯程文胡第殷承爵黃恂儒句容朱埴六合
溇張琬楊純伯凡十三人 冬十二月 詔蠲上元等縣被災額賦
五十四年春二月 詔蠲上年江浦旱災額賦 江甯布政使張聖
甯二縣學尊經閣 江浦知縣賈之屏日坐堂皇聽政不入私署訟
聲卓著

五十五年
五十六年 詔免江南帶徵地丁屯衛銀其帶徵漕項銀及米豆各
四月常算來為兩江總督 秋八月連肖先戚麟祥主試江南取中
發陳震張禮問倪張洪江甯焦起洙楊以甯句容胡永健溧水謝彬
濂夏暄凡十人

五十七年
五十八年春正月 詔截留湖廣江西漕米四十三萬石分貯江甯

通志卷一續

三

張修五 廷諭高 董修元 留滯循 元柯爰 合周欽 半夏 申郭長 昌遇馬 建立學 合知縣 啟銀器 蕃坐免 左邱明 甯劉捷 六

江蘇按察使李馥重建元甯二縣學中青雲樓樓前明應天府尹周繼所立也 上元知縣

唐開陶建預備倉

五十九年秋八月景州魏廷珍營山陳會主試江南取中上元陳景雍王亦式

吳鍾粵陳其凝馬大紀馬楊青宗成先江甯張捷三何夢篆童殿元薄履青李

崇黎東昂江浦金增凡十四人

六十年上元知縣唐開陶修縣志成

六十一年查彌納來為兩江總督

世宗憲皇帝雍正元年春正月 詔開登極 恩科春鄉試秋會試增上元江

甯學額各二十五名 恩免康熙十一年至五十年未完地丁米豆蘆課銀

三月宛平黃叔琳東昌鄧鍾岳主試江南取中上元王朝選沈楹戴瀚徐軒陳

符黃元鐸徐元肅吳雲兆毛既豐周龍章王瀛仙胡慰高江甯劉登五程之銘

蔡謹徐宗元汪波句容李東懷高澐劉賈江浦趙源楊居丙凡二十一人 夏

六月六合旱蝗知縣萬世良禱於神有羣鴉啄蝗之異 高澐學宮圯知縣叢

元燦重修之

二年夏六月 詔免江南通賦 總督查彌納改舊錢廠地為書院名曰鍾山

以課大江南之士 御書敦崇實學額賜之 增拓貢院號舍 建忠義孝

弟祠於學宮內 句容學宮重建明倫堂及存誠主敬二齋

三年

四年夏四月查彌納入京范時繹來署兩江總督 秋八月仁和沈近思天門

曾元邁主試江南取中上元丁益王鉅章吳鏡源徐異後改孝常吳元安江甯孫煒

文程之銘楊大瀆呂從律潘震洛龔錕溧水蔡錦蔡日珩凡十三人 冬十二

月 詔免江甯被災額賦

五年春正月以江淮興武等衛歸江甯府管轄 二月壬戌振江甯水災饑民

癸亥 詔江甯駐防操練水師 夏四月何天培來署江甯將軍 秋九月

詔免上元雍正四年水災額賦 江甯知縣孔毓珠建常平倉於渡船口

六年江甯知府林華年捐修江甯縣署 六合知縣蘇作睿立普濟育嬰二堂

七年春三月 詔有司防護明太祖陵 秋八月長汀黎致遠安溪李清植主
試江南取中上元王以式王以秀路陸鑑江甯王定國陳聚升龔鏡王以昌朱
觀鄭尙柱凡九人 上元知縣刁承祖以民貧賦雜設雙鴛單以杜吏胥收多
填少之弊向例戶司借供給署中薪炭任意侵挪承祖悉革除之平反疑獄人
稱爲刁龍圖 高淳舊徵班匠銀六十七名知縣金友蘭詳請歸入正供具題
存案以爲永式

八年春三月 詔史貽直署兩江總督毋庸迴避夏五月以高其倬補授六月
命貽直仍署理冬十一月以江甯府所屬溧陽縣爲貽直里居改歸鎮江府管
轄 裁江浦縣江淮驛六合縣棠邑驛兩驛丞其驛務歸知縣管理

九年秋七月尹繼善來署兩江總督 句容江浦皆建常平新倉

十年江蘇學使按臨江甯府屬始自句容移會城以下江考棚爲治所 按察
使移駐蘇州改其署爲鹽巡道署 秋七月增江甯水師守備一把總二歸將
軍統轄駐於江口增京口水師都司千總把總各一歸江陰副將統轄駐於高

資港

八月交河王蘭生歸安吳大受主試江南取中上元胡玉成艾恩蔭江

元璐王天裕王嘉會吳秉恕方道章王孚江甯童均葛祖亮句容王康佐魏子

嵩凡十二人 九月 詔尹繼善來京以魏廷珍署兩江總督冬十一月繼善

加兵部尙書銜同任

十一年春正月高其倬來代尹繼善爲兩江總督 夏大水 詔緩徵振饑

秋九月趙宏恩來代高其倬爲兩江總督 建賢良祠於欽天山以祀陳鵬年

張伯行

十二年移江甯養濟院於南城外佟園總督趙宏恩捐銀助之 溧水知縣吳

湘臬遷文廟爲南向 詔截留本年起運漕糧二十萬石於江甯等被水州縣

開春平糶緩徵新舊條欠銀及南漕等米動支倉穀分別振濟

十三年春三月總督趙宏恩奏江甯舉行保甲事宜又請上下江分闈鄉試不

果行 元甯二縣學新設灑埽會 秋八月邵基周霽主試江南取中上元楊

大灝趙燮吳斯鈞江甯胡履安伍佳高淳李伸六合鄔宏熹凡七人 是月

詔免上元水災額賦 九月以
嗣皇帝登極恩免雍正十二年以前錢糧實欠在民者其有官侵吏蝕二項一
例寬免冬十月 詔免各年漕項蘆課及學租雜稅等積欠銀十一月 詔免
雍正十二年以前耗羨銀十二月 詔免雍正十二年以前帶徵漕項及本折
銀米又 詔業戶酌減佃戶之租

國朝金陵通紀卷一

弟作儀參訂受業石承鈞校字

國朝金陵通紀卷一

江甯陳作霖伯雨編輯

高宗純皇帝乾隆元年夏上元江甯水 詔酌免被災鄉村本年額賦分別振
卹安插 秋八月興縣孫嘉淦高密單德謨主試江南取中上元張維翰吳鸞
方世雋蔣乾郭寅亮王三鑑葉錦林王大位黃怡祖倪宏受江甯蔡濯徐渭瑛
王文句容趙文洲六合袁錫夔賀鳴諧凡十六人 時高濬知縣梁欽善決獄
每聽斷觀者如堵隸呵之欽曰吾奉法無私正須示之何遂為在任三年尤以
勸農為首務

二年春正月慶復來代趙宏恩為兩江總督 夏旱句容知縣周應宿平價籌
振親履窮檐分別老弱孤獨度卹墟遠近多設粥廠全活者九萬餘口 閏九
月那蘇圖來代慶復為兩江總督
三年秋八月安州陳惠華嘉善許王猷主試江南取中上元陶紹景江甯吳肇
元六合戴之瀚戴之泰高濬陳士然許光洲孫捷凡七人 高濬知縣欽璉疏

濬韓城章家諸港以廣水利縣故不知蠶乃市桑秧教民樹插數年絲利大興
四年冬十一月郝玉麟來署兩江總督

五年夏五月楊超曾來署兩江總督 句容旱知縣宋楚望屢禱不雨乃移城
隍神像於郊相與露處士民復請歸署不允越日大雨

六年句容學使院漸圯知縣宋楚望以其中知本堂葺爲華陽書院 夏水總
督楊超曾籌振上元等二十一州縣災民 秋八月臨川李馥仁和金德瑛主

試江南取中上元胡莘隆姜國城周其儀江甯周際昌張發王琮句容汪朝勳
江浦李富世胡匯源胡兆麟俞國蘭凡十一人 是月那蘇圖復來爲兩江總

督

七年夏四月德沛來代那蘇圖爲兩江總督每朔望躬莅鍾山書院集諸生談
藝及解任士子立碑於堂曰濟齋夫子講學處

八年春正月尹繼善復來爲兩江總督

九年秋八月東昌鄧鍾岳新建葉一棟主試江南取中上元車碩朱朝宗王嘉

訓沈兆麟周升王銘琮趙天秘江甯徐見龍李承棟陳嘉謨楊熹溧水李英高
涇王朝榘李元六合厲言凡十五人 六合知縣嚴森捐俸建倉厥立小學置
六峯書院購田存銀以爲久遠計

十年 詔普免十一年地丁錢糧士民建亭雨花臺以紀 聖澤 時沈孟堅

爲江甯知府禁秦淮夜游逐流妓之寓河房者風俗一變先是有奸民請開煤
礦上官已准行矣孟堅力陳五不可以爲窯廠多在深山今孟澤背廬墓星羅
不可一例載窯戶不許外方冒充唯同鄉休戚相關不至妄挖今劉芳外縣無
賴顯與例背不可二煤路蛛絲鳥迹勢必震動墓宅不可三江南人情俱信風
水一經開鑿便疑爲破壞地脈必致聚眾釀案不可四招徠礦徒半皆亡命雖
設法鈐制流毒不淺不可五議遂罷且勒石永禁焉

十一年

十二年秋八月東昌鄧鍾岳會稽周長發主試江南取中上元汪沁談羽豐江
甯秦大士鄧宗源六合朱文熙曹文光凡六人

通紀卷二
二十三年秋九月策榜來爲兩江總督冬十一月命雅爾哈善兼署十二月以黃廷桂代之

十四年

十五年秋八月番禺莊有恭桐鄉鈕汝騏主試江南取中上元管敘張峻丁灝江甯錢露王廷璧汪以誠句容葛廷堅笄自修江浦林殿樞凡九人 是歲句容建尊經閣敬一亭於學宮內

十六年春正月 詔免江南乾隆元年至十三年逋賦以將 南巡故也 三月庚申

皇帝恭奉

皇太后鑾輿初次南巡入江甯府境過句容道中 御製五律一首辛酉 駐

蹕上元 御製恭依

皇祖韻七律一首乃題 行宮額曰天闕雲臺聯曰聖蹟常留欣繼武慈顏有喜慶承歡其二曰風華麗矚聯曰風物江山豔陽候人文都會太平時其三曰

三山天外聯曰喜聽豫遊徵夏諺時憑解阜協虞絃兩江總督黃廷桂率諸臣入覲 詔嘉其敏幹 賜額曰秉鉞三江壬戌謁明孝陵途經明故宮 御製

七律一章俄至陵奠酒敢禁樵采 御題額曰開基定制聯曰劫亂安民得統

正還符漢祖立綱陳紀遺模遠更勝唐宗復作七律一章祭畢因遊靈谷寺題額曰空籟天音又爲五言六韻排律一首是日奉

皇太后臨視織造機房 御製途聞織機聲五律一首 金陵祠宇極富自晉

宋以及 國朝綽楔如林

皇帝懷柔百神 御頒題額其卞壺祠曰典午孤忠曹彬祠曰仁者有勇徐達

祠曰元勳偉略常遇春祠曰勇動風雲方孝孺祠曰浩氣同扶督臣傅拉塔祠

曰政肅兩江于成龍祠曰清風是式 士子多獻 南巡頌者乃召試於鍾山

書院并頒武英殿本十三經廿一史各一部存貯之既復講武於小教場 御

製七律一章題閱兵臺額曰整暇精嚴聯曰詰戎宜豫昇平日振武先殷文物

邦 江甯士民於報恩寺建壇恭祝

皇太后萬壽

皇帝車駕出南門觀之 御製五言六韻排律一首又題報恩寺額曰赤烏靈
梵聯曰天半插浮圖宮殿金銀三界上雲中現忉利樓臺丹碧六朝前因登長
干塔作七言長歌一首塔凡九級每級皆 御書額一日真入覺路二日化成
資備三日舍衛莊嚴四日天際丹梯五日攬妙鬘雲六日心游萬仞七日空外
風濤八日手捫星斗九日無上法輪眺覽既周遂前幸雨花臺 御製七絕一
首 江甯城周四十里名區勝迹所在多有

皇帝幾暇巡行與民借樂北登雞鳴山 御製七言拗律一章又題寺額曰聲
覺大千聯曰法聲常現寶塔品空際似聞曇鉢香途尋曲水用謝惠連體韻
御製五古一首迤西至清涼山 御製七律一首因陟山巔題亭額曰翠微下
憩清涼寺 賜額曰臺頂飛雲聯曰波心似鏡留明月松韻如篁振午風尋出
太平門見左扇一箭飲羽又餘箭痕者二知為順治初取江甯時都統澹臺或譚
所射駐防人不忍湮其蹟故常整緝存之因 御製七律一首旋登太平隄

望後湖作卽景七絕三首復循郭西北行至觀音山摩崖題覺岸二字 御製
五律一首遂登燕子磯 御製七絕一首下覽關帝廟 賜額曰氣懾怒濤時
永濟寺有與洞和尚別號默默年一百有一歲清健如少年來迎 駕 御製
七言一絕以賜之因幸其禪院題額曰德水香林曰江天淨界聯曰吳楚江山
通廣望華巖樓閣總懸居復 御製小憩花笑軒五律一首 乙丑迴蹕過寶
華山慧居寺 御製五言六韻律詩一首並題額曰光明法界又曰寶網長新
又日精進正覺聯曰地控秣陵金殿香浮華鬘動山盤句曲石壇月朗戒珠圓
復為慈應寺題額曰慈雲普應聯曰地近秣陵飛法雨江連天塹聽潮音 時
春夏之交來牟將熟展玩物華 聖情悅豫作麥秀七律一首遂至高資港登
舟 御製高資懷古七律一首又作長江夕照歌七古一首丙寅祭江遂北渡
焉 閏五月調尹繼善為兩江總督先命高斌署理繼善旋莅任 上元知縣
藍應襲修縣志延何夢篆為總纂江甯知縣袁枚亦繼為之而設局於故隋尙
衣園後遂葺為歸隱精廬焉

十七年秋八月新建裘曰修錢塘邵樹本主試江南取中上元
萬甯江甯汪濤陳步瀛徐廷獻朱玉成談官益阮王曙龔孫枝
葉永甯張永升六合胡昭秦天義凡十五人 九月莊有恭來
十八年春正月命鄂容安署兩江總督即在江西莅事 秋八月
興王太岳主試江南取中上元陳森詹捷江甯甯楷句容李景
宗江浦陳觀光凡七人 九月鄂容安來履總督任
十九年秋八月尹繼善復來為兩江總督

二十年

二十一年春三月壬午 詔減上元等縣低瘠田地額賦 秋
桐鄉馮浩主試江南取中上元陳鸞江甯侯學詩蘭玉堂王大
駱存翥凡六人

二十二年春

皇帝恭奉

皇太后鑾輿二次南巡是時累葉承平江南地大物博民力豐
臺館藻繪山川以效子來媚茲之意於是棲霞行宮遂為東南
駕入境先幸攝山 御製遊棲霞山七律一首遊棲霞寺用尹
和韻五古六首其 行宮諸堂殿皆仰邀 御筆題額如曰白
堂曰春雨山房曰話山亭曰有凌雲意曰笠亭曰暢觀亭曰石
泉繞砌琴三疊翠篠含風管六鳴並顏山中諸勝區曰最勝幢
德泉曰萬松山房曰受翠樓曰泉石自佳曰太虛亭無不龍盤
輝映又有 御製紫峯閣七絕一首春雨山房五古一首太古
蹕棲霞行宮五律二首萬松山房七律一首幽居菴五律一首
首登最高峯望江放歌長短句一首 己酉移蹕江甯過燕子磯
御製五律一首下至關帝廟 賜額曰赫聲濯靈並為燕子磯
復有遊觀音山永濟寺五律一首旋入城駐行宮 御製七律
明孝陵奠酒因遊靈谷寺 御製七古一首並題誌公像三賢

通記卷二續

一及磯大堂

是日奉

皇太后臨視機房 辛亥講武於小教場 御製閱兵七律一首 召試士子於鍾山書院賦得鴻漸于陸得時字 御製五言八韻一首 詔免二十一年以前地丁銀及十年以前積欠漕項銀米地丁耗羨又 詔省會駐蹕之地附郭州縣本年應徵地丁銀悉予豁免 兩江總督尹繼善請 車駕幸其署 賜堂額曰惠洽兩江西園有水軒題曰不繫舟復 幸布政司署園明徐達舊邸也 賜書額曰瞻園其他登眺諸咏城中則有 御製鳳凰臺用李白韻七律一首秦淮歌七古一首石城歌七古一首遊清涼寺五律一首遙題掃葉樓七絕一首朝天宮五律一首並題額曰妙高崑閬清溪覽古七律一首題雞鳴山五古一首登憑虛閣七絕一首城外則有 御製泛舟後湖覽古七古一首幕府山東山寄題祈澤池七絕各一首大報恩寺七律一首雨花臺口號七古一首牛首山五律一首並書宏覺寺佛殿額曰萬法皆如祖堂五律一首並書幽棲寺額曰無來去處獻花巖七絕一首 壬子自江甯迴蹕復駐棲霞行宮

御製七律一首又有玲峯池七古一首石梁精舍即明僧紹隱居故址六言一首萬松

山房五律一首疊浪崖五古一首德雲菴九株松七絕各一首玉冠峯七古一首而先引云舊名紗帽峯嫌其近俚適和沈德潛詩得句云久聞攝山名秀如玉而冠即以易之其題行宮中額有云武夷一曲精廬聯云蘿薜峭中尋昔句松軒勝處得今停又云奇松詭石天然淨澗草山花自在芳又受翠樓聯云眾花勝處松千尺羣鳥喧時鶴一聲又聯云澗筑松濤相問答峯容波態總氤氳見山樓聯云松閒覓雲徑石罅晒壺天又云溪聲便是廣長舌山色常如清淨身其各勝區扁額經 御書者則曰雲片曰幽居處曰靜深曰峭蒨曰利濟安瀾曰乾德舍曰見山樓曰德雲菴曰般若臺曰峯翠波光曰練影堂 癸丑啟行過寶華山慧居寺 御製五言六韻律詩一首是日遂渡江 詔加振江南被災州縣截漕十萬石分儲備糶

二十三年

二十四年秋八月新建裘日修錢塘錢琦主試江南取中上元張鴻翼王清王

江甯阮嗣文冷震金汪槐凡八人
八月嘉興錢汝誠海
南取中上元朱本楫錢訥曹庚江甯王一筠薛稻孫龔炎秦
鍾凡八人

俞談官誥涂逢
二十五年秋七
鹽朱不烈主試
承恩溧水鄭製

二十六年恭逢
皇太后七旬萬
為江甯布政使
光督工役均而
二十七年春
皇帝恭逢

皇太后鑾輿三
五律一首是日
功德泉七律一

張宏棲霞圖七
首德雲菴五絕
古一首峭蒨室
古一首春雨山
日停雲日夕佳
過觀音門 御
一首遂入城駐
意在農桑 己
還尋青溪遺址
校畢北登雞鳴山
於鍾山書院賦得
授內閣中書
振去年被災州縣

壽因江南被災 詔改明年奉 鑾輿南巡 春三月彰寶來
詔截留冬漕分糶如二十二年例 修六合縣城知縣朱覲
民不病

次南巡三月丁巳至句容道中作七絕三首過慧居寺 御製
駐蹕攝山行宮 御製遊棲霞山七律一首紫峯閣七絕一首
自棲霞行館五律一首太古室七絕一首玲峯池五絕五首題

伴一首萬松山房五古一首般若臺五絕一首練影堂五律一
一首九株松疊浪崖七絕各一首見山樓五律一首幽居菴五
五律一首登最高峯七絕二首話山亭七絕一首石梁精舍五
房七絕一首武夷一曲精廬六言一首又題行宮諸額曰鋪翠

樓聯曰無礙搜奇披谷靄有時延賞受巖風 戊午移蹕江甯
表燕子磯五古一首遊觀音山七絕一首題永濟寺別室七絕
肆行宮 御製疊舊作韻七律一首復題聯曰詩情詎花柳樂
不謁明孝陵 御製七律一首因至靈谷寺 御製五律一首

在青溪曲六言三首 庚戌閱武於小教場 御製五律一首
御製七古一首因觀臺城 御製七律一首 召試士子
樽江漢朝宗得宗字 御製五言八韻一首江甯嚴長明中式
詔增本年江南科試學額大學五名中學四名小學三名 詔

林并蠲二十二年至二十六年節年因災緩徵及未完地丁各
直已卷二續

欠免江甯府附郭諸縣本年額賦 幾務稍閒乃事遊豫 御製有題陸機宅
東山七絕各一首遊清涼寺七古一首奇題掃葉樓疊舊作韻七絕一首朝天
宮用蘇軾韻七律一首並 賜額曰含元參化大報恩寺雨花臺七律各一首
秦淮曲七絕三首牛首山祖堂五律各一首戲題獻花巖七絕一首 辛酉自
江甯返蹕再駐棲霞行宮 御製再題幽居菴七律一首遊攝山棲霞寺仍疊
尹繼善沈德潛倡和韻五古六首佛龕贊四言一首 壬戌 車駕行經句容
望茅山作茅山正譌文一篇是日至高資港祭江神遂渡江 秋八月嘉興錢
汝誠大庾戴第元主試江南取中上元戴祖啟戴翼子王彝憲梅鈺王金英江
甯陳尙志莊允升張敷張敬句容李元芳高滔孫敬銘凡十一人
二十八年
二十九年 詔照例截留冬漕在 駐蹕地方平糶
三十年春閏二月己酉 詔免江甯府附郭諸縣本年地丁銀 是月
皇帝恭奉

皇太后鑾輿四次南巡三月庚辰過句容陟寶華山 御製慧居寺五言六韻
排律一首是日至棲霞行宮 御製有游棲霞山疊舊作韻七律一首武夷一
曲精廬七絕一首太古堂對泉有作五古一首春雨山房七絕一首用劉長卿
棲霞寺東峯尋南齊明徵君故居韻五排六韻一首夕佳樓七古一首萬松山
房五古一首般若臺口號七絕一首德雲菴七絕一首題九株松七絕一首疊
浪崖五古一首題幽居菴登最高峯七律各一首玲峯池七絕三首題張宏棲
霞圖七律一首 辛巳移蹕江甯過觀音門 御製登燕子磯七古一首遊永
濟寺七絕一首望幕府山七絕一首遂入城駐蹕行宮 御製再疊舊作韻七
律一首仍題聯云黃屋非堯志薰絃學舜心又云隨緣堪靜念所遇得幽欣
壬午謁明孝陵奠酒 御製七律一首因游靈谷寺 御製五古一首是日臨
視織造機房 癸未閱武於小教場 御製七律一首復登雞鳴寺 御製七
律一首 召試士子於鍾山書院賦得稼穡維寶得夫字 御製五言八韻一
首上元周發春中式授內閣中書 詔免二十五年以前節年因災未完蠲贖

二十六七八等年地丁河驛二十八年以前因災未完漕項暨民借籽種口糧
備築隄堰等銀及熟田地丁雜稅未完銀兩 幾務之餘仍事巡覽 御製有
遊清涼寺七律一首寄題掃葉樓七絕一首朝天宮再疊蘇軾韻七律一首大
報恩寺七律一首戲題雨花臺七絕一首祖堂五律一首至於詠懷古蹟又有
題宋院本金陵圖七絕六首題文伯仁金陵十八景如三山如草堂如雨花臺
如牛首山如莫愁湖如攝山如鳳皇臺如新亭如石頭城如長千里如白鷺洲
如青谿如燕子磯如太平隄如桃葉渡如白門如方山如新林浦七絕各一首
金陵詠古如鍾山如石頭城如長千里如古新亭如烏衣巷如邀笛步如華林
園如樂遊苑如鳳皇臺如何點宅七絕各一首 乙酉自江甯旋蹕再駐棲霞
行宮 御製七律一首又有再和沈德潛遊攝山十二詠如彩虹明鏡如幽居
菴如般若臺如桃花澗如紫峯閣如玉冠峯如千佛巖如九株松如疊浪崖如
萬松臺如白鹿泉如最高峯五古各一首 丙戌祭江神遂渡江 高晉來爲
兩江總督 秋八月安溪李宗文秀水錢載主試江南取中上元韓本玉友亮

江甯劉琢吳嘉枚龔巽吳裕德句容王駒江浦張永譽六合賈安策凡九人

三十一年

三十二年夏五月永泰入覲卓爾岱來爲江甯布政使

三十三年秋八月錢塘王際華長白國柱主試江南取中上元王金鑿朱琦陳

筠江甯張善來錢麟涂長發吳模鄭宗彝葉大奇范整句容俞懷祖樂培六合

孫秉樞凡十三人 九月梁國治來爲江甯布政使

三十四年夏五月裁江甯副都統缺 秋七月陳輝祖來爲江甯布政使

三十五年恭逢

皇太后萬壽普免錢糧江蘇輪應三十六年 秋八月新建曹秀先仁和汪新

主試江南取中上元張師說艾姓江甯李長恩車廷雋秦承業朱上池句容吳

觀駱彝六合李德鳳凡九人 冬十二月姚成烈來爲江甯布政使

三十六年春二月閔鶚元來爲江甯布政使 秋八月南昌彭元瑞閩縣陳燮

主試江南取中上元吳鎮焦若鈞江甯陶湘馬家俊張濤楊沂江浦尹式金張

世濤六合彭克惠陳森凡十人 高晉查辦河工薩載署兩江總督晉旋回任
三十七年

三十八年移青溪先賢祠於雨花山永甯菴左

三十九年秋八月富陽董誥長沙劉權之主試江南取中上元張鵬汪瑩葉世
倬江甯汪鳴林長華六合夏質陳宣張廷松高淳陳瑤夏年凡十人

四十年溧水知縣凌世御建奎星閣移文昌閣於學宮之東江甯亦建奎星亭
於泮池側

四十一年春三月陶易來爲江甯布政使

四十二年 詔普免天下錢糧江蘇輪應四十三年 秋八月諸城劉墉仁和
顧震主試江南取中上元李光裕萬保廷黃元秀王霖葉恩綸江甯吳球范敦
仁李宏德胡鍾王忻范鑑陳長春劉舉發范澐吳裕仁六合杜嵩汪濬高淳史
位凡十八人 建鳳池書院於上江二縣學之文會樓以課童生

四十三年秋九月孔傳炯來爲江甯布政使

四十四年春正月薩載來爲兩江總督 秋七月劉墉來爲江甯布政使 八
月秀水錢載大庾戴均元主試江南取中上元黃榮曾江甯端木煜歐陽忻鄧
祚永朱發春談兆華孫溶江浦戴高六合郝之鈞凡九人

四十五年恭逢

皇帝七旬萬壽普免天下漕糧一次自本年爲始 春三月

皇帝五次南巡辛丑過句容遊寶華山 御製慧居寺五排六韻一首是日至

攝山行宮駐蹕 御製五律一首又有棲霞山七絕一首太古堂武夷一曲精

廬春雨山房五古各一首紫峯閣般若臺萬松山房幽居菴德雲菴七絕各一

首攝山古風一首最高峯玲峯池疊浪崖幽居牡丹亭七絕各一首白乳泉五

絕二首 壬寅移蹕江甯過觀音門 御製永濟寺七律一首燕子磯五律一

首遂入城駐行宮 御製三疊舊作韻七律一首並題勤政堂鑑古齋額又書

聯曰竹秀石奇參道妙水流雲在示真常曰四壁圖書鑒今古一庭花木驗農

桑 詔截留冬漕十萬在 駐蹕地方平糶 丙午謁明孝陵奠酒 御製七

律一首禮畢遊靈谷寺 御製五律一首 召試士子於鍾山書院上元董教
增中式除內閣中書 丁未閱武於小教場 御製七律一首因遊雞鳴寺
御製五律一首 幾餘遊覽 御製有朝天宮清涼寺七律各一首雨中禮報
恩塔五律一首 便民河成 車駕由以旋蹕駐龍潭行宮題額曰攬勝龍潭
又曰江聲潭影聯曰岡巒縈繞桑麻富洲渚參差颿槳通又曰三茅天際青蓮
聳二水雲邊白鷺分復 御製七律一首 夏四月己酉朔祭江神遂渡江
秋八月兩江總督薩載丁憂陳輝祖來暫署百日後復任
四十六年
四十七年
四十八年秋八月嘉興謝墉大庾戴衢亨主試江南取中上元黃鎔江甯魯起
元孫一元高清王天侶凡四人
四十九年春正月 詔免江甯各屬通賦 壬午 詔免江甯附郭各縣本年
地丁錢糧又以 南巡恩命截留冬漕如前例加振上元等縣災民兩月 閏

三月

皇帝六次南巡辛酉 車駕由便民河舟行至棲霞 御製卽事詩七律一首
遂駐蹕攝山行宮復賦七律一首並題得趣樓額摩崖書太古二字疊撰行宮
聯曰峯含畫意似懸軸澗有琴音不藉桐日樹匝丹崖空外合泉鳴碧澗靜中
聞日蘿遙因幽便得趣雲峯含潤獨超羣日謀目惟芳潤因心得靜陪日不生
波處心恆定大寂光天相總融日氣接鴻濛開遠勢峯連青靄入高空已而登
最高峯憑得趣樓各賦古風一首 壬戌移蹕入城 御製自棲霞至江甯駐
蹕詩七律一首 安南使臣至召入行宮覲見 御製駐蹕江甯四疊舊作韻
七律一首 時久旱夜雨 御製七古一首俄而直隸山東河南俱奏報得雨
復賦七律一首未幾留京辦事王大臣等奏報得雨又賦五律一首 甲子謁
明孝陵奠酒 御製七絕一首禮畢遊靈谷寺 御製五律一首 召試士子
於鍾山書院江甯司馬賈中式授內閣中書 乙丑閱駐防兵 恩賞老民老
婦 江甯行宮六瞻 清蹕亭榭之勝踵事增華 幾務餘閒 奎章照耀有

彩虹橋綠淨榭勤政堂鑑古齋塔影樓鏡中亭判春室聽瀑軒七絕各一首其
遊覽所及又有朝天宮清涼寺五古各一首雞鳴寺七絕一首 己卯由觀音
門旋蹕 御製燕子磯七律一首永濟寺五律一首是夕駐棲霞行宮 御製
棲霞山七律一首武夷一曲精廬五古一首紫峯閣萬松山房幽居菴德雲菴
般若臺幽居牡丹亭玲峯池七絕各一首疊浪崖五律一首白乳泉太古堂五
古各一首 戊辰啟蹕道出句容遂遊寶華山 御製五排六韻一首是日至
張家樓祭江神渡江

五十年春二月 詔免江甯等府四十七年以前逋賦 夏大旱

五十一年春三月薩載告病以閔鶚元代理兩江總督薩載旋卒調李世傑代
之 召江甯布政使劉導來京以袁鑾代之 秋八月大興朱珪大庾戴心亨
主試江南取中上元談泰江甯王夢桂謝豫度焦以厚陳春華汪恩汪炳文鄭
槐金有光江浦韓廷秀凡十八人

五十二年春二月王兆雲來爲江甯布政使 夏水 詔給籽種口糧 冬十

一月書麟來爲兩江總督

五十三年春二月康基田來爲江甯布政使 秋八月仁和胡高望湘潭謝振
定主試江南取中上元顧椿年阮紹文黃恩崇朱桂楨陳克廣江甯周之鏞吳
裕智江浦陳謨六合卞應榮凡九人

五十四年江甯屢有火災總督書麟作水星鼎於南門城上以鎮之 秋八月
仁和胡高望遂安賀賢智主試江南取中上元程紹伊張師式王嘉言陳廷碩
方仲梓江甯蔡之銘句容駱存智江浦翁炳高溇吳嶸王長駕陳上源凡十一
人

五十五年夏四月陳大文來爲江甯布政使 句容知縣王光陞詳稱糧書江
甯年等將花戶完納錢糧拆封侵挪前巡撫閔鶚元批飭江甯府審訊經新巡
撫福崧參奏查辦奉 旨書麟革職卽以福崧署總督王光陞與前縣吳汾皆
革職聽勘 六月調孫士毅爲兩江總督

五十六年夏四月長麟來署兩江總督書麟旋復任 詔緩徵四十八年至五

十四年因災積欠銀米分四年帶徵 冬十二月陳奉茲
五十七年秋八月滿洲鐵保鍾祥李潢主試江南取中上
吳森朱嘉漣江甯龔鯤胡樾路增端木煒鄭佐廷薛玉堂
溧水朱楷六合陳鴻緒唐湘陸玉書凡十七人 時許兆
發伏聽斷如神禁秦淮夜遊表桐樹灣為孝順里以旌里
五十八年

五十九年秋七月調富綱為兩江總督未任以蘇凌阿署
六十年錢糧一次 滿洲瑚圖禮陽曲顧德慶主試江南
之桂陳汝梅張之銘談培范濱江甯冷宜南秦繩曾王鼎
凡十一人

六十年春正月調福甯為兩江總督未任仍以蘇凌阿署
權之嘉興錢福胙主試江南取中上元朱本元龔元鼎李
李光業黃庚易友澄呂增敏江甯徐溶吳鏞張鑑孫應奎

德昌高滄魏伯瑩凡十六人 是歲句容知縣任可舉建

仁宗睿皇帝嘉慶元年 詔普免天下錢糧賚老民絹綿

孫曰秉來為江甯布政使

二年建忠義孝弟祠於學宮 江甯府教授金襄暨紳士

廟名曰同善堂

三年夏五月 詔修明孝陵 修上元江甯兩縣學 秋

萬承風主試江南取中上元金惠榮陳克鳴陳喆譚清瑞

侯雲錦侯雲松周銜翁恩元陳整范國柱孫應駒王鼎輔

汪元聯六合李楠胡體元凡二十人 九月李奉翰來為

詔以江浦水災撥漕米備振

四年春二月李奉翰卒費滄代為兩江總督 冬十一月

高宗純皇帝升配禮成 恩免乾隆六十年以前積欠緩

籽種口糧漕糧銀兩

為江甯布政使

胡本淵陶鈇下枋

容筮立樞王從懋

為江甯知府摘奸

八月 詔普免

中上元王德修周

唐廣漢高滄陳洪

秋八月長沙劉

晉陳文光殷長發

容孔傳勳六合鄭

經閣

肉有差 秋七月

立卹養局於龍王

月山陰平恕甯州

遲楫江甯湛配道

鼎豐吳鉉譚亮采

江總督 冬十月

地丁耗羨及民欠

五年秋八月石門陳萬全開州何學林主試江南取中上元梅沖江甯鄧廷楨
范滄王敏江浦陳澍六合姜本禮汪鶴鳴凡七人

六年春三月同興來爲江甯布政使夏四月襄行簡代之秋八月汪日章又代
之 滿洲英和南豐湯藩主試江南取中上元李光昱蔡世松季恩沛陳公綬
江甯金佐廷凡五人 冬十二月先福來署江甯布政使

七年

八年夏六月陳大文來爲兩江總督 秋七月康基田復爲江甯布政使

九年秋八月大庾戴均元新城涂以勳主試江南取中上元陳文富楊煊陳燦
勳江甯金芝馮蔭祉高涇陳秉惠江浦吳庚凡七人 冬布政使康基田濬秦
淮河

十年春正月鐵保來爲兩江總督 布政使康基田建雞鳴書院於府學以課
童生 上元知縣溫綸湛嚴停柩不葬之禁無主者歸義冢鄰境皆仿行之又
表遺遺金者之閭

十一年縣學尊經閣災廿一史版及三段碑落星石皆燬布政使康基田重建
之因立尊經書院以課生監 夏五月許兆椿代爲江甯布政使

十二年秋八月萍鄉劉鳳誥武陵趙慎畛主試江南取中上元金志岐段榕孫
巖江甯陶濟慎汪濺張霖陶煥悅句容孔傳慶六合朱方凡九人

十三年夏六月楊護來爲江甯布政使 秋八月新城陳希曾湘潭周系英主
試江南取中上元孫廷松章貢金李溟伍長恩江甯張德鳳張曾周濤鄭光燁
徐鑑秦耀曾句容裴鑑趙模江浦游思洛許夢麟六合夏乾高涇邢圻張逢辰
凡十七人

十四年秋七月阿林保來爲兩江總督史積容來爲江甯布政使 冬十月以
皇帝五旬萬壽恩賚老民綿絹米肉有差 冬十二月兩江總督阿林保卒於
位松筠來代其任

十五年秋八月滿洲桂芳新城饒絢主試江南取中江甯端木坦張丹書方傳
穆鄭兆祀李芳端木焯馬湘六合姜士冠高涇劉思洛凡九人 是歲上元縣

署災知縣朱景昌重建之

十六年春正月勒保來爲兩江總督夏六月百齡代之 秋七月陳預來爲江甯布政使冬十二月胡克家代之

十七年夏小旱井泉竭 秋八月陳觀來爲江甯布政使 江甯知府呂燕昭重修府志聘郎中桐城姚鼐爲纂修 江浦知縣丁猷駿修學宮

十八年秋八月鄉試以人眾擁擠搜檢遲滯初九日辰刻始封門監臨江蘇巡撫朱理被劾落職 是科會稽茹棻南昌黃中模主試江南取中上元丁金榜陳大均王德輿伍長華何其興胡澄江甯陳維屏金志伊江浦尹式金六合劉維桐林長霖凡十一人 冬十一月陳桂生來爲江甯布政使 是歲名捕妖人朱毛里閭騷動訛言日興

十九年夏大旱 秋七月李長森來爲江甯布政使 是歲大饑富民義捐以振國子司業秦承業主其事立法甚備凡振貧民十七萬口官亦發倉米平糶分設局於四城 詔免徵銀糧十之六 立老人堂於迴光寺清節堂於油坊

巷又於剪子巷設崇義堂以課貧童其法尤良 冬十一月慶格來爲江甯布政使

二十年春二月陳桂生復爲江甯布政使 夏旱大疫 水月菴僧鏡澄以術見方榮昇者朱毛里黨也鏡澄偵獲之總督訊得實磔諸市上鏡澄功爲建正覺寺於三條營

二十一年夏五月李堯棟來爲江甯布政使 初立救生總局於信府河草鞵夾黃天蕩皆設有紅船 秋八月蕭山湯金釗錢塘陸言主試江南取中上元林端易長發陳克寬江甯秦鶴齡鄭應舉吳坦何銓楊明善駐防巴永阿德亮凡十人 冬十月松筠來爲兩江總督十一月以孫玉庭代之 繼昌來爲江甯布政使

二十二年濬運瀆新河巡道方體主之上元縣葉申靄督工最勤

二十三年夏小旱 六月琦善來爲江甯布政使 修上江兩縣學泮官坊 修浦子口敵臺 秋八月黃梅帥承瀛東陽盧炳主試江南取中駐防菊林松

年善祿上元金鎮曹森周森陳榮易長華章沅江甯陳維垣張應釗吳鴻謨張恩洋江浦陳椿凡十五人

二十四年春以

皇帝六旬萬壽恩詔蠲十年至二十一年未完民欠錢糧銀米賚老民絹綿米肉有差 二月朔江甯府學大成殿災 秋八月蕭山陸以莊閩縣廖鴻藻主試江南取中駐防佈騰阿塔蜚圖上元齊秉震梅汝沅汪烜江甯周開麒吳繼昌王宮淦吳介寶戴凝之范承祖朱彥喆凡十二人

二十五年夏小旱 督署大堂及科房災 改雞鳴書院爲奎光以大成殿落成有祥雲見也 冬十一月普恭來爲江甯將軍以風流儒雅知名 額特布來爲江甯布政使

國朝金陵通紀卷二

弟作儀參訂受業石承鈞校字

國朝金陵通紀卷三

江甯陳作霖伯雨編輯

宣宗成皇帝道光元年春 詔賚年老軍民絹綿米肉有差 夏山田旱給民口糧 秋大疫 八月蕭山湯金釗新建熊遇泰主試江南取中駐防福克精阿上元溫肇洋吳廷貴馬沅談承平朱錫鑾丁金詔江甯沈錡范承典溧水濮瑗六合朱家炳戴文燦凡十二人 九月鄭裕國來爲江甯布政使 是時吏治修明江甯知府趙炳言廉明剛斷案無積牘江甯知縣劉大烈喜微行采訪宵小斂迹江浦知縣王頰以運丁疲累借庫款生息爲調劑法永免編審繼任者爲馮應渭一意撫字遂終其事 六合移建文廟於西門高岡

二年春加賞災民口糧 夏四月程國仁來爲江甯布政使秋七月以戴三錫代之 興府學洒埽會紳士所自捐辦也 增貢院西供給所號舍 八月滿洲穆彰阿平湖徐士芬主試江南取中駐防福魁上元蔡宗茂朱紹曾賈星垣羅鳳儀江甯朱性堂張以游朱應坊車瀛溧水王用子江浦毛鉞六合魏錫昌

凡十二人 九月張志緒來為江甯布政使

三年夏水給災民振銀以義捐恤貧士高澹知縣秦頤齡施濟平糶 江蘇學

政周系英以罰款重修下江考棚及其西大程子祠 上元知縣武念祖重修

縣志訓導陳拭主其事 立上元江甯兩縣免僉快丁碑從紳士伍光瑜等之

請也 秋八月給江浦等縣水災一月口糧

四年春加振水災饑民以義捐餘款濬新開運瀆河 布政司署火 秋溧水

疫 冬十一月貸江甯駐防及兩江督標兵丁餉銀 十二月魏元煜來為兩

江總督

五年夏小水 五月琦善來為兩江總督 始設豐備倉 句容知縣毛正坦

修水利開河道至瑣山止 秋八月黃陂劉彬士新城陳用光主試江南取中

駐防西金額薩丙圖上元劉坦張介福管同王世培陳之驥歐陽長海江甯潘

鐸陶寶蓮蘭滋疇孫懷仁柴沂劉沅顧雲韶句容唐治王雲錦江浦郭名杰趙

慶修六合劉國霖秦澹熙金楠凡二十二人

六年夏清涼山翠微亭下發蛟水 卜鸞停自六合知縣移任高澹多惠政民

稱卜青天

七年夏五月蔣攸銛來為兩江總督 林則徐為江甯布政使冬十月賀長齡

來代之

八年春正月貸江甯駐防修屋費 連月沈陰夏溧水無麥 秋八月滿洲鍾

昌宜黃黃爵滋主試江南取中駐防額齡佈祥瑞上元溫肇江李鈞陳崑玉江

甯劉富春劉恆春章煥張錫麟陳元慶婁家蘭朱嶼句容馬兆增凡十二人

江甯府通判聯璧毀八府塘淫祠為欄以護行人又以挑夫多把持懸印瓦法

江甯知縣傅璋修南門闕石道自長干橋至鎮淮橋重建南門城樓 高澹

知縣許心源創建學山書院規條嚴密又勘蘆灘戒溺女禁茶社勸農桑有古

循吏風

九年江甯布政使賀長齡濬城內外河道整飭書院規約刊經世文編以教士

六合知縣雲茂琦建萬壽宮社稷壇先農廟以妥神人與六峯書院以課生

童立保善堂以恤嫠婦

十年夏六月陶澍來為兩江總督 清涼門草場人剷地得鐵椎數十枚入縣庫 冬十月緩徵上元等縣水災額賦 十一月陸言來為江甯布政使 十一年夏水紳民議開上水關牖板 六月 詔以水災免徵銀米十之四并命給上元等縣災民口糧 秋七月林則徐來為江甯布政使建議倡捐煮振資送留養收孩瘞棺捐衣勸糶養佃典牛借種籽禁燒鍋凡十二則 貸江甯等緣營兵餉 秋八月地震 貸江甯駐防兵米 是科鄉試以水改期九月武鄉試改次年三月 九月延津申啟賢廣安鄭瑞玉主試江南取中駐防貞格上元夏鏞江甯夏埏劉德敷施越賡徐永慶王佐才溧水夏之霖凡八人 冬十月趙盛奎來為江甯布政使 振上元等縣水災 江甯知府李璋煜剛正嫉惡逐朝天宮道士許靜臨之淫泆及天界寺某僧勒石禁小押與嫁娶彩轎民風為之一變 十二月緩徵上元等縣水災額賦 十二年春二月緩徵句容等縣水災逋賦 三月靜海寺災明太監鄭三寶使

西洋返時所造也規制壯麗至是灰燼後雖重建不及十之三四焉 夏五月緩徵上元等縣水災額賦及河灘學租 總督陶澍建豐備倉於旱西門街廣豐備倉於羅寺轉灣 秋七月裁江甯府照磨 八月蕭山湯金釗光澤龔文煥主試江南取中駐防慶德慶明薩吟布上元談承誥李琛姚錫華貴杰曹士蛟伍長松汪杰江甯梁增敷周葆元葉聲揚鄧爾恆吳士楨溧水蔣璽江浦嚴正凡十七人

十三年夏水給高淳溧水二縣振 秋溧水疫 八月鈔庫街火文德橋闌圯溺死數十人 九月振上元等縣水災 冬十月楊簧來為江甯布政使 再振上元等縣災民緩徵額賦 十二月再振上元等縣水災貸江甯旗營兵餉 江甯知府俞德淵移建鳳池書院於五松園 疏支河至北門橋乾河壩而止建見山亭 重修朝天宮得明永樂告天文石刻

十四年春正月給上元等縣上年災款口糧籽種 連月雨甚溧水無麥停徵上忙錢糧 夏四月緩徵上元等縣逋賦五月緩徵高淳等縣水災額賦 秋

八月江蘇巡撫林則徐監臨鄉試患點名擁擠創設信礮立旗幟陰以兵法部勒分三路而進日晡即畢 是科仁和龔守正昆明趙光來典試取中駐防錦

春薩畢圖上元朱皞許鯤後改宗衡伍承平方俊伍承吉侯雲倬黃家聲江甯吳元

昌葉毓祥吳鶯王俊臣句容陳立溧水徐大文徐大綸六合張李凡十七人

冬十一月緩徵上元等縣額賦 十二月貸江甯旗營銀米

十五年春正月展緩上元等縣被災逋賦 夏小旱 秋八月以

皇太后六旬萬壽恩 詔蠲十年以前正耗民欠錢糧及因災緩徵帶徵銀數

並借給籽種口糧牛具 華陽卓秉恬襄陽單懋謙主試江南取中駐防兆德

壽昌吉祥上元陳俊吳雙伍長馨全紹鎡王鳳藻阮嘉言薄彭齡陳魯夏堃姚

天麟曹士鶴程傳厚江甯吳吉昌盧士瀛王國琛張熙麟張鳳儀江浦吳嘉楨

六合徐真沈樾高溇諸鑑凡二十四人 冬十一月緩徵上元等縣被災額賦

十六年上元江甯兩縣學中重建青雲樓 移建八蜡廟於欽天山

十七年修上元江甯兩縣學魁星閣 總督陶澍設惜陰書院於盩山以課舉

貢生監經古 句容知縣劉佳因災後出示收買蝻子是秋大熟遂籌建豐備

倉勸民種桑育蠶 八月清苑王植蒙古柏稜主試江南取中駐防文海炳元

上元陶桂馨周洛余白玉劉紹曾江甯陳士安陳士全吳鼎昌甘熙沈墉范先

秩何德昌高溇童良杰凡十四人

十八年夏水 五月唐鑑來為江甯布政使 上江兩縣學新明德堂并志道

等四齋 江浦知縣鄧夢鯉修文廟告成

十九年春三月林則徐來為兩江總督未蒞任以前巡撫陳鑾署理 夏水

秋八月宜黃黃爵滋烏程鈕福保主試江南取中上元戴鼎亨伍承欽孔繼周

歐陽長山王溶王大椿劉定敷鄭杰江甯郭長華王體仁葉覲揚六合厲世瑄

朱麟祺凡十三人 冬十二月陳鑾卒於任以鄧廷楨為兩江總督未上伊里

布來代之

二十年夏四月成世瑄來為江甯布政使秋七月裕謙來署兩江總督 是時

水潦溧水尤大知縣劉佳捐給口糧刊高平義振錄 八月給上元等縣水災

口糧 文慶 林恩 振上 二十 振江 例 總督 二十 六月 以禁 閉城 乃定

修屋費 詔免溧水錢糧并加振給 鄉試改期如上年例九月滿洲
血陽胡林翼主試江南取中駐防延齡貝琿阿普昌上元陸鈞李頤江甯
江士鐸江文熙顧捷慶陳鐸六合林中芬巴光誥凡十二人 冬十一月
九等縣水災貸江甯駐防及督協各營兵餉
年春正月程喬采來署兩江總督 貸上元等縣水災口糧 二月展
甯府災民 三月伊里布回京裕謙復為兩江總督 夏高淳水給振如
涿水地生毛 六月緩徵上元等縣新舊額賦 秋九月牛鑑來為兩江
冬十月加振上元等縣災民並免額賦十一月十二月展振二次
二年春二月展振上元等縣災民 夏四月王庭蘭來為江甯布政使
以寅朔日食晝晦見星人心惶駭 訛言紙人翦人辮髮及雞毛 英夷
鴉片煙事擾海疆數年至是駛入長江總督牛鑑自吳松遁歸己丑江甯
庚寅閉市城復啟城中大小戶皆徙至東南鄉沿途有劫掠者官捕斬之
癸巳紳民創行保衛其法分段設局募勇守禦樹柵置械佐以旗與燈

日稽 草鞵 丙辰 政使 欽差 鼎查 覺寺 源河 英代 二十二 月貸 崇恩 試江

巡相救相助鳴金擊柝五城之遙呼吸流通奸宄斂迹 乙未洋船抵
是日復閉城 秋七月辛亥夷人占居上元縣丞署 在觀掠邁皋橋
人來議和將軍音德布總督牛鑑遣洋商顏柳等往犒師因與之言布
恩形親於其舟撫之遂設局於白衣菴勸捐以款夷辛酉夷人輸平燕
英及伊里布牛鑑黃恩形於其舟旋即靜海寺行答拜禮丁卯夷人濮
利遜等入城謝食之於王府巷上江考棚庚午立和約明日夷人游正
恩塔乙亥洋船遵約起旋去 八月丁丑朔大水陡發平地四尺以桃
故也 辛卯撤保衛局 九月城中大疫時自鄉回者十室九病 耆
鑑為兩江總督 冬十一月長至日雷
年春耆英以欽差赴廣東璧昌來署總督葉名琛為江甯布政使 三
甯駐防及督協各營兵丁銀 夏五月陸費瓌來為江甯布政使旋以
之 六月裁減江甯駐防營馬匹 秋八月黃縣賈楨豐城徐士穀主
取中駐防圖理訥福成上元張燦輝朱彥華葉庭鑾張保和高涓田萬

清凡七人 冬十月總督耆英回任 十二月陳繼昌來爲江甯布政使初上
詣府學明倫堂集諸生講書訓誡 是歲塞定淮門

二十四年春二月璧昌復爲兩江總督 夏水 秋八月裁龍江關查驗木植
稅局 平湖徐士芬大竹江國霖主試江南取中上元李作枚陳鳴玉俞弼堯
汪家勳江甯孫棣田種珏范先敘六合唐嘉德高涪陶汝霖凡九人 高涪知
縣王檢心懲治訟棍禁諸淫祀以高梳會積貲創義學義倉各百餘所修城南
永濟橋 冬十二月貸江甯駐防兵丁銀米

二十五年恭逢

皇太后七旬萬壽一切 恩蠲如十五年例 夏水 冬十二月徐廣縉來爲
江甯布政使先是議行大錢至是罷之 是時江甯知府徐青照勤於其職與
江甯知縣范仕義皆究心民瘼焉

二十六年秋八月蒙古柏葭廬陵黃贊湯主試江南取中上元顧永熙毛文煥
倪嘉祥范培玉肇元談鎬王延長田寶琛江甯孫琦陳燮吳士松六合劉承炳
凡十二人 九月傅繩勛來爲江甯布政使

二十七年春三月李星沅來爲兩江總督 英夷與青浦民鬪不勝遣其副領
事羅伯孫等六人乘輪船至江甯訴於總督總督權辭撫之旋出游報恩寺居
民環觀競拋磚石擲及其首導行之員弁委曲調護之明日卽起旋去

二十八年夏六月馮德馨來爲江甯布政使 秋大水給溧水高涪振免徵

二十九年夏四月陸建瀛來爲兩江總督 六月大水較去秋尤甚平地深丈
餘街衢行舟 給振免徵 秋大疫 七月楊文定來爲江甯布政使 鄉試

改期十月是科滿洲福濟濱州杜翻主試江南取中上元倪嘉禧陶桂芳江甯
夏家鎬章蕈趙鍾靈梁承先溧水馮毓璋凡七人 是歲宣城圩民掘東壩蘇
常人控告兼及高涪知縣向柏齡力爲辯之始得雪

三十年總督陸建瀛請文章加試性理論一場

文宗顯皇帝咸豐元年春 詔免道光三十年以前民欠地丁錢糧 夏溧水
麥秀兩歧 秋八月蒙古瑞常黃陂金國均主試江南取中上元侯甲瀛馬鼎

程燮丁椿年謚命年江甯傅遇年姜若照蘭恩紱張維垣管近修任朝棟句容
笄佐堯江浦陳萊周天源六合汪達元劉國熙葉琳凡十七人
二年夏大星流有聲 地小震 地生白毛 秋上新河地出火以水灌之
滅填以土猶見煙縷縷自中出 八月錢塘沈兆霖仁和葛景萊主試江南
中上元楊丙文葉紹庭孫承熙江甯蔡琳張曦照凌丙鈞周肇元王殿鳳劉
鏞六合朱覲光凡十人 冬總督陸建瀛奉 旨會剿粵賊於湖北巡撫楊
定移守江甯與布政使祁宿藻會辦團練設籌防局於王府慧圓菴招募鄉
萬人皆市井之無賴者以舉人或文生領之稱爲總領 松江提督福珠洪
以其眾來助防 十二月庚戌望欽差大臣陸建瀛出師建三軍司命大燾
承平久兵不知戰多有募人代戍者與室家離別哭聲震野 寇警日迫居
鑿壬寅年之遷避爲鄉人所欺凌乃皆不動至有從附郭移家入城者城中
婦幾九十萬人巡撫楊文定復禁人外徙各城門委員稽察可入不可出故
城受禍尤烈云

三年春溧水地震有聲 正月甲子欽差大臣陸建瀛自湖北廣濟之龍坪
軍遁回不見賓客巡撫楊文定委印還蘇州時提督福珠洪阿屯雨花臺惟
數帳房中臥疲卒數人旗幟飄蕩而已尋退入城庚午布政使祁宿藻出南
籌防見無一營一卒大忿而歸先是議毀附城民房以防地道爲有力者所
遂止 粵賊自太平四合山順流下壬申焚板橋癸酉掠江甯鎮轉至響葉
欲突聚寶門城門閉城外窯灣多馱米腳夫見賊少遽與之鬪呼城上人求
械不可得而賊來益眾始愬而潰 是日賊游騎犯江浦之石蹟橋 甲戌將
軍祥厚率駐防兵登陣令民備水缸以防火晚間明燈守夜是夜賊取各寺佛
像衣之綵服持以惑官軍城上人乃傳言關帝顯聖居民遂比戶焚香以謝
乙亥賊船自新洲大勝關泊至草鞋夾帆檣林立繞城西南築壘二十四踞
恩寺塔俯瞰城中且藉以施礮掠上新河木商竹木作雲梯日夜環攻將軍
厚以城下民房皆藏賊乃縱人下焚之 是日布政使祁宿藻以積勞憤鬱
血數斗卒於南門城樓 二月丁丑賊詐稱向榮軍至焚七里洲作燒賊船狀

以誘我啟門上元知縣劉同纓絕上偽差官訊之得實乃擊以礮賊傷數百而止 戊寅賊攻南門守者日晡不得食義民汪松崖炊飯并寒菜自擔餉之眾皆感奮時增募市人守堞人日三百錢故無食 是日賊分兵掠浦口把總包定國戰死 賊渠洪秀全自稱天王與偽東王楊秀清偽北王韋昌暉偽翼王石達開分統部眾而秀清最狡黠既至金陵臨城巡視見有新塗堊處喜曰城頭挂白不久必破矣 儀鳳門外靜海寺與天后宮毘連院宇宏敞賊潛於其中穴城乙酉晨大霧地雷發城崩賊擁入某佐領力戰圍戶千人助之驅賊出以土囊填其缺少頃第二雷發兵勇割耳獻功者未歸伍遂不支而三山通濟各門賊又以雲梯上兵勇皆潰城守營副將沈鼐持刀大呼日有敢逃者斬手刃數賊死之城遂陷總督陸建瀛走至小營黃家塘賊追殺之提督福珠洪阿死於大功坊上元知縣劉同纓急歸署公服坐堂皇朱書日第殺我勿傷百姓賊入相顧日此劉青天也擁之去同纓大罵乘閒投龍王廟前潭死之時職官殉節者又有署布政使江南鹽巡道涂文鈞江安督糧道陳克讓督中副將程

三光督左游擊周成理事同知承恩江甯府通判程文榮江甯知縣張行澍江甯織造筆帖式圖桑阿庫大使祥壽江甯府教授歐陽晉上元縣教諭夏慶保訓導陳耀奎江甯府經歷顧璜署清化巡檢朱慶焯上元典史吳申之一時義烈為東南冠 大城既破將軍祥厚等退守駐防城萬眾一心三逐賊至淮青橋傷賊數千人會火藥被焚賊遂乘虛入祥厚及都統霍隆武皆巷戰死之賊因屠駐防城嬰孺無遺復驅隱匿之婦女出聚寶各門盡於橋上殺之河水皆赤 自去冬十二月至今皆淒風苦雨寒氣凜冽是日始晴霽 丙戌丁亥夜城中火數發皆士民不從賊而自盡者 戊子楊秀清入城奉洪秀全居督署諸官署則各偽王踞之 秀清始居藩司署繼移將軍署終住黃泥巷何二宅 名江甯為天京 又謂之小天堂 號曰太平天国 改麻法大建三十一日小建三十日節氣皆歸朔望立偽法十丞相檢點指揮將軍總制軍帥師旅帥卒長兩司馬伍長其衙則有典碯典錦碼聖糧聖庫詔書承宣等名而以總制領之 城中大宅盡燬樹木皆伐惟妙相菴為石達開所據名曰翼花園得無恙設典花總制官 賊既據城擇民居之廣者驅婦女實其中名為女館以偽女官統之 亦有卒長司馬等名以粵

楚悍婦爲之呼
爲老姊妹焉

日派以差役禁防甚嚴雖夫妻母子不得同處然賴此亦免淫

掠保全者眾 時江浦土寇李三引賊三人入縣城知縣某棄城走賊旋去官

捕李三殺之 庚寅賊下竄龍潭徧據老鶴河等要隘分掠句容濱江各鄉

丙申欽差大臣向榮始以兵至乘銳破賊二十餘壘遂壁孝陵衛庚子攻朝陽

門外土城克之 壬寅欽差大臣琦善至揚州城外分黑龍江馬隊駐江浦六

合各隘 甲辰向軍進屯土城逼城而營 三月溧水地又震 有夷酋輪船

至下關貨洋鎗火藥於賊賊以鼓吹迎夷酋入城聯教通款 賊犯六合之東

溝瓜步黃瓜河鄉民殲其二十七騎 庚戌向軍破賊通濟門外三壘乙卯襲

七橋獲據之斷其南北往來路丁巳乘霧奪鍾山辛酉夜以噴筒火箭射城中

城賊大驚榮傍城築十八營賊不敢啟東門 是月向軍別隊燒觀音門賊船

千餘艘 夏四月揚州賊曾立昌遣其黨襲浦口壬子犯六合知縣溫紹原以

團勇禦之於龍池不勝武舉達成榮戰死賊進踞南關夜半火起賊駭爲神大

亂兵勇躡之殺偽丞相一總制四燒賊略盡餘眾走還金陵時有鐵鑄六合紙

糊南京之謠 賊旣不得逞於六合乃於九洲洲駐馬河徧立營壘 賊中水

師粵人與楚人鬪楚人不勝多詣向軍降 五月賊出南門掠善橋 琦軍總

兵武慶屯浦口 秋七月琦軍於浦口立水勇局 賊水軍焚棲霞寺時難民

旅寄攝山登高納涼賊望之疑爲官兵故及 賊派流至大勝關官兵敗退賊

遂焚板橋揚帆而上 九月江甯四鄉創聯村法善橋有四十八社朱門有三

十六村皆譏察嚴密雖不能遏賊鋒而游兵之害稍戢 冬十月向營鑄大礮

成示稱六萬斤欲以虛聲恐賊也 賊由儀徵犯東溝千總夏定邦力戰卻之

十一月賊由蕪湖渡高涇湖欲圖東壩總兵鄧紹良迎擊敗之於永濟橋於

是高涇永城鄉相國各圩練首史傳經等始治鄉兵 江甯廩生張繼庚謀於

水西太平諸門翻城應外兵賊酋有受約束者自九月至是月凡七上書向營

又繼城親詣營泣請師期終以雨雪失約謀泄賊捕囚繼庚拷掠之 是月兵

勇以餉不時發劫糧臺向榮親往撫之始定 揚州敗賊至江甯營於上方門

前營將與爭利向榮遽令止之僅以中營衝擊賊果潛出朝陽洪武各門劫大

營幸前營未動遂與戰賊敗還城 十二月江北營黑龍江馬隊奉調歸伍琦軍以都司鄧鳳林統固原兵屯六合境 是歲江甯知府趙德轍寄治溱化鎮團練鄉兵又設立撫卹局留養城中難民居文士於虎洞優給廩餼

四年春二月湖廣雲貴諸營與川兵圍向榮禁之不止乃調川兵屯上方門以避其鋒 丁亥琅邪鄉練總薛如松等敗賊於龍潭 賊犯浦口總兵武慶會六合軍擊退之六合知縣溫紹原又自敗賊於通江集 三月遊擊鄧鳳林移屯江浦戊午賊分犯浦口及縣城皆拒卻之 江甯義民宛正龍張士義等以

張繼庚前約引官兵十餘人易買人服入城與繼庚所結死士伏神策門側癸亥夜軍功田玉梅與張士義斬守城賊擲頭城下呼官兵官兵未即進天已曙賊四集玉梅跳免賊捕得士義窮詰主名不得繼庚以計給賊誅賊死黨二十

五人與士義均罵賊被殺 夏四月辛未賊犯浦口武慶拒卻之壬申又敗諸眾善橋 六月向軍以總兵吳全美紅單船泊浦口 秋七月庚申賊由蕪湖入犯東壩守壩參將德麟福廣皆戰死向軍遣副將傅振邦自水陽進擊大捷

遂乘勝徇高淳湖賊歸過南鄉焚牛首山寺 閏七月鎮江援賊與城賊約攻大營向榮自將駐上方橋指搗諸軍敗之他股由雨花臺洪武門撲七橋甕營將軍蘇布通阿迎擊亦潰退 六合水勇屢奪江南賊船賊斂船入港是月溫

紹原遣千總秦懷揚敗賊於團洲斬馘無算 江甯將軍托明阿代琦善為欽差大臣接統江北軍 時楊秀清以糧繼驅婦女出城割稻於是脫難者甚眾 八月壬子賊掠江浦之石蹟橋 賊於九洲洲結木障數十丈謀下窺九月

六合溫紹原率軍焚其簿於八卦洲 向軍都司長貴敗鎮江援賊於句容之東陽托軍部將姚文蔡應龍亦毀倉頭等處橋梁 高淳知縣楊承忠治團練立分局於東壩 賊於北河口設鐵鎖橫江以阻艇師之上駛副將李德麟參

將張攀龍率眾斷之 冬十月托軍約向軍會攻浦口癸卯李德麟等由金湯門外五道並進渡浮橋搗其巢金陵賊飛檄來援戰方酣南軍師船已破浪至衝擊走之 是月向軍克雨花臺石壘乃逼南門而營賊燒燬報恩寺塔懼為

官兵所踞也

五年春正月賊由太平門竄句容之龍潭下蜀西城岡龍王廟連營十餘丁卯
鎮江軍總兵余萬清來迎戰遂壁東門橋二月辛丑鎮江賊由西門沿江犯橋
頭練目柯二等戰死壬寅與龍潭下蜀賊合築壘高資向軍總兵虎嵩林德安
擊破之癸卯賊退 賊沿江謀下竄向軍會六合練勇邀擊之七戰七勝平七
里洲賊壘焚其船溫紹原因施橫江鐵鎖於黃天蕩以礮船遏通江集賊來輒
敗去 三月托軍總兵王鵬年敗賊於江浦諸隘皖軍總兵吉連來屯烏江以
兵單退駐曹城向軍亦拒賊於浦口 是月蕪湖賊犯高涓之烏溪團勇扼河
拒卻之 夏四月乙巳向軍敗賊於江甯鎮己酉水師副將吳全美以紅單船
掃蕩三山賊壘斬鐵鎖上游之江路以通 五月托軍總兵多隆阿屯六合
六月江水溢 壬辰賊再掠橋頭 秋七月皖軍參將李臣虎攻江浦之駐馬
河不克而死 八月庚戌皖軍總兵吉連敗賊於曹城石蹟橋 九月辛未賊
犯東陽向軍總兵秦如虎等迎戰甲戌參將張玉良以援師至大敗之 冬十
一月向軍總兵張國樑敗竄賊於仙鶴門甘家巷棲霞街窮追至石埠橋而還

己卯秦如虎又敗之於觀音門 知府溫紹原率練勇攻九洲石壘都司秦
懷揚冒霧先登克之因無守兵旋爲賊奪 十二月賊屢撲句容之老鼠山龍
潭東陽諸營 是歲向軍初以兵扼溧水之烏山

六年春正月鎮江賊出犯橋頭提督余萬清由山南迎勦至下蜀適千總張朝
廣自涪化至敗賊於上山岡賊鋒仍銳戊子向軍總兵張國樑截賊於倉頭二
月上山岡練首巫良雍南宮練首余應龍李相廟練首高世珍來助戰壁於下
蜀一夕成營壘五癸未官軍小卻三月戊午張國樑敗賊於下蜀值提督鄧紹
良由鎮江追賊渡便民河擊之於東陽又敗之賊焚營遁紹良遂屯石埠橋
都統德興阿代托明阿接統江北軍 駐江浦游擊鄧鳳林以揚州告警撤回
協守丁卯賊陷江浦千總徐綸庚軍功王長貴戰死賊遂由寶豐莊陷浦口總
兵武慶棄軍走賊踞葛塘集將犯六合都司秦懷揚扼諸南關求救於向軍適
總兵張國樑自句容回乃檄令渡江擊賊至毛許墩知府溫紹原來會師敗賊
於龍池追至藏軍營盤城集水家灣屢敗之乙亥收浦口乙酉復江浦留向軍

副都統明某屯冶浦橋德軍都司藍新恩等屯江浦 江蘇巡撫吉爾杭阿圍鎮江久不得要領夏四月令江甯知府劉存厚進高資築三壘於煙墩山絕賊通道楊秀清患之遣悍賊數萬出句容合鎮江賊圍存厚營知縣松壽鹽知事張翊國戰死吉爾杭阿馳入救之登高瞭賊中礮死劉存厚亦陣沒副都統綳開投江以殉 五月旱蝗江南北大饑 有大星西南流 辛巳賊復陷江浦知縣曾勉禮墜馬死 是月游擊張玉良敗賊於甘家巷楊秀清遣衆陷溧水時向軍負中外重望諸路告急金陵者警報朝聞援師夕發而城外賊壘濱江要隘亦無日不事攻戰賊見我軍營壘空虛炊煙日減日夜謀所以覆之乃密約鎮江賊自東來拊官軍背城賊自西與相應溧水之賊橫截其旁而楊秀清自率悍黨出通濟門會鍾山賊撲七橋夔向榮張國樑徃常勝不以爲意忽大營同時火起士卒不戰而潰國樑獨以身翼榮突圍出由涇化鎮過句容周覽其城曰是不可守也令知縣趙廷銘率民避賊未幾賊至陷之向軍遂退保丹陽 六月丁未蕪湖賊犯高淳團長杭益進戰死城遂陷 秋七月欽差大

臣向榮卒於丹陽署兩江總督怡良權統南軍駐常州 賊之踞金陵也洪秀全深居偽宮日事淫泆軍政皆決於楊秀清秀清自稱禾乃師贖病主聖神風九千歲諸偽王如韋昌暉石達開雖同起草澤而視如偏裨當向軍既退自以爲功莫與京陰欲自立嘗詭稱天父下凡責秀全犯天條笞之數十秀全怒復寬解之因加號勸慰師令其下呼之萬歲秀全不能堪召韋昌暉密圖之昌暉新自江西敗歸秀清禁其衆入城昌暉恚亦欲殺秀清一日秀清召飲昌暉卽席刺之洞胸令於衆曰東王謀反吾奉天王命誅之遂閉城搜其黨殲焉石達開時在湖北聞亂趣歸頗誚讓昌暉昌暉將併圖之達開縋城走甯國昌暉悉殺其母妻子女秀全乃大恐陰約秀清餘黨於城外共攻偽北王府昌暉潛逸渡江獲而磔之夷其族召達開同羣議如秀清故事輔偽政秀全不可達開危懼還走安慶不復歸以偽安王洪仁發爲福王洪仁達爲腹心皆秀全兄弟也於是始起諸酋略盡賊之規模亦漸不如初矣 八月甲辰總兵傅振邦會團總曹獻龍克東壩丁未收高淳遂與參將虎坤元徇溧水會張玉良軍九月玉

良敗賊於紅藍埠時總統張國樑亦克句容之寶堰黃茅莊壬戌奪近關橋甲
戌敗賊吉利村遂薄溧水踰濠將登賊間襲其後國樑回擊破之 冬十月欽
差大臣江南提督和春接統南軍駐句容境 江浦賊掠石蹟橋新店綽廟辛
亥至陳家淺團總諸生張步林戰死 十一月戊午總統張國樑移駐小玗橋
練總高世珍敗賊於李相廟賊以光里與下蔭路不通乃攻大祝廟欲借江上
賊合屯世珍移營而西賊不能過

七年春正月己卯張軍敗賊於句容東門外賊擾下蔭橋高世珍率團練敗之
二月賊以官軍復逼乃於祿口秣陵湖熟龍都包句容溧水之境築壘七十
餘里 己丑和軍總兵傅振邦敗賊於溧水之烏山平賊壘二十六副將米興
朝擊城賊之出援者亦敗之 溧水敗賊合皖賊犯句容之郭莊總兵傅振邦
與之相持十餘日三月總統張國樑來援大敗之 德軍以總兵安勇統浦口
防營 夏五月甲子總兵傅振邦會副將虎坤元克溧水 賊攻句容之包家
窰練總高世珍禦之總統張國樑來援賊卻退遂壁於野雞山總兵虎嵩林來

屯盤山閏五月甲辰張軍會傅振邦克句容 秋八月賊掠棲霞圩帶子洲靖
安廠遂犯龍潭河北及太平橋下蜀等處副將虎坤元會練總高世珍擊退之
遂壁於廟頭 九月總統張國樑扼高資絕鎮江運道賊亦屯運糧河北兩相
持國樑遣將毀其礮臺而自往鎮江 冬十月蕪湖賊由水陽犯高渚知縣楊
承忠以團練敗之於永濟橋 庚午總統張國樑既克鎮江追賊至句容之倉
頭與虎坤元夾擊敗之十一月坤元又敗之於上山岡遂進至湖熟 欽差大
臣和春復立營於孝陵衛 江北賊欲由西江口南渡德軍敗之遂分竄石蹟
鎮 北軍欽差大臣德興阿進駐浦口 江浦城賊與九洲賊遙相策應德
軍提督鞠殿華駐西門板橋以遏之 十二月句容敗賊退據秣陵關
八年春正月和軍大將虎坤元李若珠追圍之時總兵虎嵩林屯高渚見夜隕
一星軍中有識占驗者曰此主正中折一大將於是馳書各營并戒其子坤
元勿輕動坤元以秣陵破在旦夕不可坐失事機奮然曰如諸君懼死我請往
遂率數百人進甫及賊營飛礮中其額額半墮而坤元猶未仆也勒馬急回至

營距躍而死士卒感之哭聲振地誓爲復仇於是攻圍愈急 辛丑德軍都司
王熙堂克石蹟鎮 二月庚申總兵李若珠克秣陵關追賊至黃泥菴葛塘寺
復敗之 三月甲子總統張國樑敗賊七橋李若珠往來誘敵洪秀全開城
出大隊逆戰國樑若珠合兵截之圍其東南二門總兵戴文英會攻雨花臺印
子山復大破之 皖賊與捻逆合股謀犯六合江甯知府溫紹原告急於甯營
提督張國樑渡江賊已至葛塘集遂會紹原師敗之於毛許墩 駐馬河賊酋
投誠德軍總兵安勇會六合溫紹原師收江浦遂分兵戍石蹟鎮 夏四月皖
賊自石橋薛家口窺江浦德軍大將富明阿敗之於大劉莊綽廟集 和軍總
兵李若珠敗賊於銅井慈湖 五月和軍副將張玉良馮子材擊退太平神策
門撲營之賊平東北城外賊壘略盡 六月德軍游擊劉綜等屯江浦 時金
陵圍師八萬人和春與張國樑定計築長濠因賊自水西門迤東歷通濟太平
諸門北達七里洲綿亘百餘里洪秀全患之秋七月悉銳出突長濠國樑乃令
東北圍師分攻太平金川門西南圍師擣雨花臺殺帶洲賊壘則遣賴鎮海艇

師擊破之國樑策馬爲諸軍先踰溝燒賊屯賊潰入城不敢復出矣 八月德
軍調石蹟鎮之兵分守小店都司詹啟綸駐求雨山癸亥皖賊陳玉成會九洲
洲賊越江浦襲破浦口大營欽差大臣德興阿登廣艇遁眾大潰乙丑回陷江
浦分兵攻六合以綴我軍翼長溫紹原敗賊於胡盧套丙寅大霧賊自楊家河
渡焚掠程家橋竹墩雷官集施官集四合墩馬家集諸鎮巴山土圍與戰殲焉
賊乃麋集六合城下日夜攻圍庶吉士唐嘉德如和軍乞援丁卯副將馮子材
督兵四千先至屯冶浦橋戊辰遇賊而潰守備王家幹戰死總統張國樑以收
揚州遲至賊逼之於陳板橋不得進九月庚寅賊以地雷轟城城遂陷道員江
甯知府溫紹原六合知縣李守誠皆死之 皖賊由太平府來犯溧水亦於六
合陷之日破縣城知縣周觀銘死之冬十月和軍總兵張玉良自祿口進援攻
克紅藍埠賊壘癸卯遂復溧水提督張國樑敗竄賊於高古山追至江甯鎮凡
小丹陽陸郎橋龍磨山賊壘悉平 十一月甯國賊掠高淳之雁翅斗門和軍
總兵戴文英擊敗之 是歲江甯知府鄭濟美設撫卹局及書院於溇化鎮以

招徠士民

九年春欽差大臣和春以江甯長濠成奏免錢糧 正月江浦賊薛三元乞降
戊戌和軍令降將李世忠受之用其眾復浦口適皖軍檄世忠追賊小店賊回
撲浦口據之世忠再戰賊退去二月皖賊結九洲賊窺浦口和軍總兵李若
珠會守將周天培擊走之三月乙未提督張國樑會李若珠等敗賊於九洲
平附洲賊壘 德興阿被劾罷江北不復置帥以江南大營兼轄自此以後提
督張玉良李若珠等常屯六合之東南圍攻縣城秋七月擊賊勝之冬十月賊
出紅山窰截李若珠後和軍總兵馮子材渡江因參將李世忠眾以救之復大
挫若珠糧盡部將詹啟綸密探賊中隱語大呼而出若珠從之賊竟弗阻乃收
潰眾屯揚州西賊乘勝陷浦口提督周天培戰死 是月江南鄉試借浙江舉
行楊式穀卓保來為考官取中上元陶楫夏如椿江甯方朥勳楊桂年朱期保
徐毓銀鄭鏡清吳長年凡八人 江浦告急十一月總統張國樑自將渡江援
之克北山新卡進攻城南各壘平之復蹙之磨盤洲求兩山陳家集賊潛埋火

藥於江浦對岸火發自焚官軍乘之連奪西北二十餘壘 是歲賊屢掠句容
之橋頭下蜀

十年春正月總統張國樑克沿江賊壘乙亥取九洲洲已卯擊敗浦口援賊進
屯寶塔橋賊由瓜子山來撲又力卻之乃收浦口渡江而南綏帶洲守賊秦禮
國七里洲守賊謝茂廷皆來乞降二月戊戌國樑遣部將熊天喜由七里洲攻
克下關秦禮國從綏帶洲內擊劉季三應之上關亦克賊遁還江東門 三月
杭州竄賊由建平襲東壩守壩都司匡興仁方興元戰沒遂陷高淳典史徐邦
彥死之賊酋黃有才乃據縣城壬辰偽侍王李世賢陷溧水總兵魯占鰲知縣
張毓林死之偽忠王李秀成自溧陽犯赤山湖閏三月丁酉陷句容和軍自長
圍成將士頗驕謂大功可旦夕就而汎地最廣每千里赴人之急洪秀全規知
大營兵薄益促來援之賊十道並進於是偽輔王楊輔清自溧水犯秣陵關李
秀成自句容犯淳化鎮城賊復日夜攻大營幫辦江南軍務張國樑拒戰八晝
夜賊勢日增將士以餉為和春所減又不時給心皆攜貳遂私布傳單已酉大

雷雨酷寒一夜之間各營火起自相驚潰欽差大臣和春總統張國樑乃退守丹陽國樑傷重躍入丹陽河以殉和春引決於嶺墅關自此以後江甯城外無官兵者二年 是月降將薛三元棄江浦浦口走揚州叛李世忠禽斬之夏四月賊渠洪仁政賴文洸入據江浦號爲天浦省 六月兩江總督曾國藩拜欽差大臣督辦江南軍務 江甯將軍巴揚阿與總兵馮子材退守鎮江已卯敗賊於橋頭炭渚 秋七月句容鄉練總高世珍等謀結內應復縣城賊偵知之殺世珍於石墓大肆焚掠因築石壘於寶堰運蘇州之糧實其中以濟江上之賊 是歲江北旱蝗民食桑椹草根皆盡 十一年夏五月句容賊趙天義掠橋頭鎮江守將提督馮子材擊敗之秋七月賊復掠下蜀民多溺紅旗橋死八月橋頭民團與賊夜戰於下坊埭陵互有夷傷九月馮子材敗賊於湯岡民團攻句容不克 丁亥宣城賊自金寶圩來犯高潛之相國圩仙圩及秦家馬家保勝等圩城賊黃有才自西應之民團拒戰斬有才於雙橋渡戍子相國等圩皆陷團總史傳經等俱死之 冬十二月乙

亥皖軍提督李世忠收六合是時江浦及浦口諸賊不協又缺糧餉眾情攜怨

國朝金陵通紀卷三

弟作儀參訂受業石承鈞校字

國朝金陵通紀卷四

江甯陳作霖伯雨編輯



穆宗毅皇帝同治元年春正月江浦賊黨乞降丁亥李世忠入據之戊子收浦口己丑克石蹟橋敗九洲洲援賊三月江蘇布政使曾國荃帥師自安慶東下掃蕩沿江諸賊壘夏四月遣王明山以東梁山水師奪烈山石壘辛巳進壁板橋句容賊竄踞茅山唐陵等處五月練總吳廷珍等攻入賊壘後隊不繼遂戰死壬午曾軍攻新林關守賊降乃遣兵繞三汊河後逼大勝關編木作橋伏精兵其畔而以後隊捲旗疾趨賊懼為長圍所困乘夜縱火棄巢走癸未大勝關三汊河兩壘皆平兵部侍郎彭玉麐時駐金柱關聞國荃懸軍深入慮有挫失遂調水師由烈山駛入頭關甲申昧爽國荃亦至水陸夾擊賊棄關遁玉麐進攻江心洲洲有石壘雙峙屹若堅城水師飛礮入壘賊亦穴牆還擊日既晡水師挾火具登岸蛇行蘆葦中逼壘縱火因躍入賊驚潰遂奪蒲包洲進泊金陵之護城河口國荃乘勝驅軍直逼雨花臺而營玉麐乘輕舸巡至龍江

通志卷四
關知府曾貞幹駐三汊河江東橋傍水築壘保西路糧道是爲湘軍圍攻金陵之始洪秀全見官軍已薄城選悍賊二萬犯雨花臺營敗還江北大將都興阿遣師船自瓜洲鼓柁而西攻觀音門襲燕子磯破之皖軍李世忠自六合渡江克石埠橋東陽龍潭皆爲楚軍聲援 癸卯曾軍敗賊於陸郎橋 蘇州賊數萬人援六月癸巳曾軍與戰於雨花臺互有夷傷辛酉復撲大營敗入城乃謀分兵綴我丁卯列二十餘隊各趨一壘而以銳卒突雨花臺長濠濠寬深不得過則以火器環擲國荃憑濠拒守伺賊已懈令部將劉連捷拔柵出擊大敗之偽對王殪於陣時溽暑大雨國荃令軍士冒雨修垣洪秀全益調甯國賊出涓化鎮夜襲營丙子國荃遣將要擊復敗之 提督黃翼升以水師駐浦口 江南北有飛蝗 秋八月江南大疫軍中尤甚死者山積營哨官無不病者惟統帥曾國荃日夜拊循獨無恙 閏八月甲午偽忠王李秀成率眾自蘇常來援金陵兵號六十萬東起方山西訖板橋連營數百曾軍不滿三萬賊圍之數匝彭玉磨楊岳斌水師皆阻隔不相聞諸將懲向榮和春之失謀潰圍就水師退

保蕪湖欽差大臣曾國藩在安慶聞之亦飛檄令撤圍國荃固執不可乃分圍師爲三以其二防城賊侵襲而自將其一當援寇一夕築小壘無數障糧道以屬之江賊益番休迭進蟄附環攻累箱實土以作櫓楫挾西洋開花礮自空下擊所觸皆摧國荃留孱卒守棚選健者日夜拒戰更代眠食常以火毬大礮燒賊無算賊仍抵死不退軍士傷亡頗眾己酉部將倪桂節中礮殞國荃左頰受鎗傷血漬重襟猶裹創巡營歷半月氣稍固而偽堵王黃文金擾東壩提督鮑超小挫於新河莊賊燄愈熾乃掘地道陷官軍壘國荃屢堵合之亦時以穢鹵倒浸穴中九月壬子偽侍王李世賢復自浙江糾眾至合秀成軍號八十萬國荃度其新來氣銳誠諸將厚集陣以待之賊負板擔草土填濠我軍拒濠發礮賊屢卻仍堅壁不出相持兩晝夜甲寅始發萬人開壁擊之軍士氣十倍呼聲動天當者無不摧靡一日內破堅壘十三殺八千人援賊氣奪乃益鑿地埋火藥辛酉兩穴同發土石飛躍如雨大營牆圯賊隊猛進國荃督將校露立牆外環擲火毬閒以鎗礮賊前者旣殪後者復登踰三時牆缺始合殺悍賊數千羣

賊乃謀晝息宵攻輪進以疲我連營周百里其近者距官軍才二十丈仍潛開
隧道乘雨夜轟營國荃令各軍掘內濠翼以外牆破其地洞七賊計始窘有退
志 是月鎮江守將馮子材破賊於句容之湯岡毀其九壘 冬十月江南統
帥曾國荃度圍賊力疲乃誠諸將秣厲以俟壬午引軍出濠克十餘卡知賊不
任戰軍益大出癸未部將李臣典等出東路曾貞幹出西路彭毓橘蕭孚泗等
出南路甲申天嚮曙臣典燒東四壘火光燭天西南諸賊望之洶懼棄壘遁貞
幹偵三汊河賊亂急趨之遇逃寇則縱兵要擊敗諸板橋周村彭毓橘追至牛
首山王可陞搜賊方山西諸賊在東路者繞南門逸其在西南者走秣陵關凡
十三偽王之眾萃於一隅經四十六日而不得逞傷亡五萬人始解圍去金陵
大軍乃解嚴 十一月偽忠王李秀成率敗賊截江至九洲洲進犯浦口皖軍
提督李世忠突圍走陷之遂抵江浦石蹟鎮諸軍亦潰 是月水師提督楊岳
斌連破賊於三汊河遣金柱關守將羅逢元燒賊舟於高淳之護駕墩 時曾
國荃已擊退蘇浙援賊攻守益暇欽差大臣曾國藩終以孤軍蹈危地爲失策

乃議秦視沿江諸壘赴金陵親決進止焉

二年春正月大學士曾國藩來視師登大勝關入雨花臺營見圍軍堅穩大喜
始罷退師之議留十日還安慶 二月鎮江守將馮子材追敗賊於句容之薛
村 三月曾國荃擢浙江巡撫留辦金陵軍務 夏四月癸卯夜曾軍分六路
進薄金陵李臣典等攻雨花臺石城趙清河等攻聚寶門南卡晏禮周等攻西
卡何玉貴等攻東卡陳湜出中路蕭孚泗易良虎等左右應之夜已半軍士蛇
行而進東草填濠將登堞賊驚覺然礮外擊踣五人眾頗逸巡李臣典斬二卒
以徇舉旗直上毬箭星落入城天向明敵樓火發賊奔救我軍已冒煙入遂克
雨花臺偽城諸將乘勝掠地金陵城西南九壘皆下國荃分二千人守石城築
六新壘輔之 五月溧水蝗 乙卯水師提督楊岳斌侍郎彭玉麐次江浦陸
師提督蕭慶衍出烏江與提督鮑超劉連捷會師浦口江浦橋林賊皆不戰而
遁走九洲洲賊拒不納投江及餓死者無算統帥曾國荃乘夜至新江與岳
斌玉麐覘九洲洲形勢見城堅礮利護以戰艦度陸師斷難飛渡宜先清南岸

諸隘以搖其心丁巳遣部將丁泗濱等南從秦淮向下關喻俊明等北繞永安洲向草鞵夾彭楚漢等爲後應王磨率水師據九洲上游牽賊勢岳斌自督戰以枯荻灌油燒賊艦數百緣牆而登下關草鞵夾八壘皆克乃移兵向中關水流箭疾羅俊友中礮死己未國荃分兵襲燕子磯破之岳斌偵江濱有間道達九洲賊濠乃約國荃令陸師伏叢葦中從隄缺泗水而進彭楚漢張錦芳師船夾洲上下丁泗濱攻南岸中關庚申昧爽兩岸戰旗並舉人人殊死戰中關賊閉不出九洲賊伏洋鎗隊於洲三面狙擊官軍精銳多傷亡至夜王磨令曰洲破乃還師不者傳餐而戰時月色冥濛西南風大作我軍聞移船近賊壘以火箭射賊舟風烈火猛延及洲上卡棚喻俊明等麾軍直上成發翔彭楚漢從左右呼譟而登丁泗濱自南岸鼓棹飛渡將士踐尸以進九洲遂破其萬餘賊無一脫死者長江肅清 癸亥曾軍攻長干橋賊壘大破之國荃將合城圍乃檄蕭慶衍等自江浦南渡復增募萬人於是金陵之師近四萬矣 六月提督鮑超進軍鍾山將屯孝陵因軍士病駐神策門洪秀全遣黨出儀鳳門攻之又

出太平門犯劉遠捷營皆不利 秋七月乙巳朔賊犯下關提督李成謀力戰卻之 壬子曾軍攻印子山克之進攻上方橋橋在城東南隅賊運糧道也甲子國荃令蕭慶衍出印子山東偏賊而軍城賊來爭蕭孚泗李臣典張詩日分禦之營賊堅壁不出癸巳熊登武越橋五里築小壘六賊患之糾大眾出戰伍維壽等以馬步包抄敗之追至秣陵關破十餘卡悉奪泊河戰艦孚泗度賊已窮令軍士負薪乘夜填濠遂克上方橋而江東橋石壘高峙環以木城陳提圍攻數月不克八月丙戌夜風霾蔽月提選銳卒數百襲破之分抄至旱西門眾壘皆下 時城東尙有數隘近城者日中和橋日雙橋門日七橋襄稍遠者日方山土山日上方門高橋門迤南則爲秣陵關以至於博望鎮亦金陵外輔也統帥曾國荃以東路未平不能制賊之死命九月令蕭慶衍等擇小河紆曲之處結筏架橋圖東渡立營賊已先據河拒我慶衍隔河發礮朱吉玉李祥和踞西岸築三壘與賊相持甲子李祥和從上游蕭孚泗從下游渡河破其五壘賊來援蕭慶衍且戰且築東岸壘已成戊辰賊復諸道並出蕭孚泗彭毓橘陳

通鑑卷四
提等扼雙橋門以東蕭慶衍進中路戰少卻將士奮臂大呼賊皆反走慶衍縱騎兵斷其歸路遂克上方門高橋門而右路方山土山之賊爲熊登武所敗亦棄壘奔於是七橋襄諸賊思遁蕭孚泗彭毓橘扼其東李臣典遮其西城中忽出大隊兩軍相搏互傷死孚泗乘夜縱火賊冒煙突走遂克七橋襄將由方山南進秣陵關攻博望鎮賊環鎮築七壘上可應水陽旁可控金柱關金柱守將朱南桂聞鮑超有事於水陽約朱洪章等夜出小丹陽銜枚疾進昧爽抵博望克其二卡賊開壁大戰武明良從間道襲其營賊反顧七壘已易官軍幟乃錯愕狂走南桂追之長流鬻溺死強半國荃以博望既克則中和橋之勢孤己巳令趙三元率馬步七營南掠秣陵至中和橋一戰克之秣陵賊見馬步驟至棄釜逃諸將追至河干阻水不能渡僅殺尾賊二百餘自是鍾山西南無賊壘矣辛未國荃親至孝陵衛勘地勢將移營賊出朝陽太平門來襲蕭慶衍陳提分截之蕭孚泗李臣典傍賊抄入戰方酣有賊目指揮督陣國荃伏鎗殪之賊陣乃亂僞章王順王退入城餘賊走溧化鎮冬十月水師統帥楊岳斌彭玉麀

會師由澄溝塘溝入攻高溧乙亥克滄溪長樂賊酋楊友清以縣城降 戊寅曾軍克溧化溪隆都湖熟三岔鎮燬賊壘二十餘於是金陵東南剗削略盡 庚辰提督鮑超會彭楊水師克東壩溧水賊酋楊英清乞降乙酉復其城 戊子曾軍進屯孝陵衛 是月僞忠王李秀成因蘇州反正領敗眾數萬分布句容一帶鮑軍敗之於亭山柳橋乃自率數百騎入太平門勸洪酋棄城同走不聽遂留金陵助城守 十一月曾軍掘地道成戊申火發神策門城圯我軍肉薄爭登阻月城橫洞不能克傷死三百餘 統帥曾國荃度賊糧將匱約提督楊岳斌水師巡江見奸民運米入城輒奪之又令總兵朱洪章等繞鍾山後斷陸路運道於是益募新軍圍師增至五萬人

三年春正月辛酉曾軍大將朱南桂冒雪營城北路偵賊酋李士貴赴句容護糧伏兵要之賊棄糧走國荃益銳意合圍癸亥周歷洪山白土山神策門太平門僞忠王李秀成自將出鍾山南攻朱洪章營洪章與武明良出濠夾擊沈鴻賓等出右路武文山等出左路戰良久殺數百人賊退上山羅雨春攀巖而上

中鎗幾墜沈鴻賓繼至各挾火毬火箭擲壘中賊突火逃遂克鍾山石壘賊所署爲天保城者也國荃遣黃潤昌等戍之令蕭孚泗蕭慶衍出山北列隊太平門築三壘以王遠和等守之維時梁美材屯洪山朱南桂屯白土山塞神策門餘後湖阻水爲圍於是金陵城圍始合賊糧絕矣李秀成屢以無米告洪酋衆曰闔城食甜露可以養生甜露者草也秀成無如何乃日放婦孺出城節食而於城內種麥濟饑二月旬容賊約金壇寶堰諸酋助守縣城三月乙巳督鮑超克三岔內午克塔岡追至旬容賊目徐邦本約內應丁未夜舉火城東賊開南門遁遂收旬容餘賊東竄寶堰己酉鮑軍追敗之奪壘五庚申又敗之於茅山金陵城周百里曾軍合圍以來日令軍士鑿隧道凡南門一穴朝陽至鍾阜門三十三穴篝火而入地或崖崩窟塞則縱橫聚葬於其中賊乃附城築垣以拒我謂之月圍穿穴其內時以毒煙沸湯薰灌之軍人多死乙丑國荃攻克之焚其火藥礮賊無數我軍亦傷亡三千人夏四月戊寅旬容敗賊僞珥王洪仁珥等由天王寺回竄大山頭圖犯溧水窺東壩別股由漆橋竄塘泄癸未水師柳壽田遏諸固城湖不得進是日鮑軍敗賊於高淳之楊村賊還竄大山頭甲申總兵譚勝達等又敗之賊竄廣德而去楊岳斌鮑超二軍奉檄援江西乃以蘇軍提督劉銘傳屯旬容鄭國魁屯東壩曾軍遣提督梁某駐江浦五月僞天王洪秀全以事急憂懼仰藥死潛瘞於僞宮中其子福自稱幼主賊自失天保城後防守益密龍廣山有石壘極堅賊所號爲地保城者也統帥曾國荃計不得此城則形勢終不便乃日夜發礮攻之己巳晦提督李祥和等奪其壘遂築礮臺於上俯瞰城中礮擊處城堞皆圯國荃慮師老且生變益督李臣典等當礮密處潛穴其下而積溼蒿覆沙土高與城等聲言將踐登以疑賊六月天久不雨國荃露禱須臾龍見雨大至甲申地道成國荃夜寢若有人促之驚起趨洞口呼守軍李秀成果出襲營遣黨持火彈燒積蒿伍維壽彭毓楠分擊獲免乙酉國荃令朱式雲草檄諸軍懸賞募敢死士待城破先入於是李臣典朱洪章伍維壽武明良譚國泰劉連捷沈鴻賓張詩日羅雨春九人誓先登日午地道火發城崩二十餘丈甌石雨落李臣典等螳附爭登

賊傾火藥下燒我軍眾稍卻彭毓橘蕭孚泗手刃數人弁勇皆奮乘城缺入朱洪章沈鴻賓羅雨春等攻中路在偽天府北劉連捷張詩日譚國泰等攻右路循臺城趨神策門適朱南桂等梯攻而入遂合取儀鳳門左路則彭毓橘由內城至通濟門蕭孚泗等奪朝陽洪武門守陣賊誅殺殆盡而羅逢元等從聚寶門入李金洲從通濟門入陳湜易良虎由旱西水西門入李秀成方趨旱西門爲陳湜軍所阻乃還走清涼山匿民房中適水師黃翼升攻奪中關乘勝至旱西門與湜等合於是金陵九門皆破日已暝矣賊猶保偽天府夜半縱火自焚偽幼主洪福因突圍走黃潤昌等露立龍廣山袁大升等循城南遇逃賊要擊斬數百人張定魁等追及之湖熟俘誅略盡餘黨挾洪福走廣德以去國荃令閉城救火獲偽玉璽一金印一蕭孚泗搜獲偽王兄洪仁達偽忠王李秀成凡殺賊酋二千餘斃賊十餘萬捷聞封曾國藩一等侯加太子太保銜曾國荃一等伯太子少保銜並賞戴雙眼花翎李臣典一等子蕭孚泗一等男其餘文武論功進秩有差 欽差大臣曾國藩自安慶啟節來江甯丙申至孝陵慰

勞將士已亥巡視城垣庚子掘偽天王洪秀全屍焚之於江千秋七月乙巳誅偽忠王李秀成及洪仁達等傳首東南諸省 壬子一等子李臣典卒於軍詔以江南底定免江甯府屬同治四五六等年錢糧其三年以前皆以兵災蠲除 浙江巡撫曾國荃以傷病未愈乞開缺屢疏乃許甲寅散遣所部二萬五千人留萬人防守金陵餘分屯各隘 乙卯總督曾國藩巡視貢院榜示房屋章程八條八月暫回安慶九月丁丑移節入金陵暫居水西門內偽珩王府壬午曾國荃奉 詔祭明孝陵冬十月率凱撤湘勇回湖南 時城郭初復公私掃地無存乃設善後局以總諸務立保甲局以清房產借給七縣牛粒籽種以勸農事修貢院以舉賓興築駐防城里巷以處見存旗兵八百餘名 建江甯府城隍廟於金沙井知府楊鍾琛塑神像於紗帽洲迎之以入 浚江甯城內支河 六合立昭忠祠 十一月改斂前總督陸建瀛遺骸曾國藩親詣弔祭 是月特開鄉試曾國藩因林文忠舊法點名旗外加以紅燈自一增至十四分起以便瞭望中路設浮橋以涉至今遵用之昆明劉崑山陰平步青來爲

考官取中上元周維燮王雙壁濮肇華張文銳江甯卓熒六合賀廷壽劉嘉善
江浦顧先孚凡八人 以穀貸郵農免其繳還從縣紳王延長請也 籌費於
善後局以卹宦裔士族之接婦 江甯布政使萬啟琛乞病歸李宗羲來代其
任

四年春正月規立昭忠祠於雞鳴山麓 設粥廠以食饑民 立七屬縣招墾
局 重建下江考棚修程明道先生祠 濬秦淮河 二月興復鍾山尊經鳳
池三書院以分課生童改建鍾山書院於迴光寺故址 大裁湘勇駐金陵者
僅留四營 試武士騎射月升降之如書院例以靖凱徹將弁 繕城填濠勒
銘於缺口以紀功分墜四郊戰骨凡爲塔於朝陽門外二於旱西門外三民間
之私埋者不與焉 江甯知府涂宗瀛設普育堂於翦子巷清節堂於小油坊
巷 紳民復興救生局崇善堂 夏四月總督曾國藩赴山東勦捻李鴻章來
攝其事 五月移金陵書局於飛霞閣 改建江甯府學於冶城山 移織造
機局於珠寶廊 江甯知府涂宗瀛設種茶局於石城門內蛇山 修清涼山

巔翠微亭 是月高淳山田旱圩田水溧水合境皆水 秋江浦水圩隄壞知
縣裘輔請款修築久乃獲允 建江甯城北鼓樓戒碑 設機器製造局於南
門外西天寺故址延法國人馬德里爲教習又置存儲火藥局於石城門內濟
生菴北軍械所於古城隍廟傍 建李公臣典祠於雨花山巔 修豐備倉於
旱西門牌樓大街 重建江甯知府署權以爲總督行轅 冬十月江浦立昭
忠祠
五年春二月雷震棉花隄砲船皖南鎮總兵張志邦及將弁三十餘人皆死
復建惜陰書院於盩山麓以經古詩賦課士 江甯布政使李宗羲遷書院高
才生延之於署月一課之 修雨花山方忠文公墓及烏龍潭顏魯公祠 立
卹糝粥廠於東關頭 溧水建城隍廟於大東門 江浦建木橫橋及茅塘橋
皆通驛孔道也 法國立天主堂於豐富巷 冬十一月 詔曾國藩回總督
任

六年春三月大學士曾國藩入金陵居民焚香以迎 夏旱水涸建龍神廟於

靈谷寺入功德水側以祈雨有驗也 重建布政使司署 始建鳳池書院於
新廊 增貢院西隅號舍以其近狀元境街故名狀元新號 修徐中山王墓
坊 建文津道濟二橋於新府學前修文德木橋於舊縣學前 六合重建縣
署 秋八月南皮劉有銘樂陵王榮瑄主試江南取中上元李森葉有年秦際
唐江甯陳達盧崧哈賢招徐坦陳元恒句容蔣鳴慶江浦張步蟾六合黃之瀛
凡十一人 冬十一月曾國藩移督直隸啟行日士民攀送者填塞街巷馬新
貽來爲兩江總督

七年春 詔江甯府七屬暫行抵徵又從前水旱偏災均蒙蠲免 水師陸師
及金陵昭忠祠成門同廟異規模宏壯內有也園花木清幽臨水一榭尤極閒
曠 設皇華館於水西門外 冬增設育嬰堂於翦子巷 六合改建忠義孝
弟祠於西門入佛菴址

八年總督馬新貽練新兵四營於金陵 建江安糧道鹽巡道二署上元江甯
二縣署 夏水開東關以通淮流初道光中常患水因用石塞東關至是拆去

仍用牖版 秋孫衣言署江甯布政使 建縣學文廟於秦淮水北舊址 重
修龍蟠里汪文毅公偉祠 修燕子磯亭 高淳建城隍廟於西門縣學文廟
亦告成又建前政許公心源祠 冬錢德承爲江甯知府承涂宗瀛之後謹守
成法士民安之 梅啟照來爲江甯布政使 建火神八蜡廟於中正街移武
廟於雞鳴山府學故址 以水災設典牛局 高淳知縣楊福鼎建龍王廟於
西門湖神廟於固城湖口

九年春永廣上元江甯二縣學額各五名六合六名以總兵王永勝欠餉報効
恩也 二月紳士王延長石楷籌七縣公車費本銀二千餘兩存典生息
設清江火藥局於草場製造火箭局於神木菴 修三江營攔江新隄 夏城
中訛言拐賊以迷藥盜嬰兒後漸及少壯者道中幾斷行人 秋七月山東人
張文祥刺兩江總督馬新貽於江甯府署旁箭道中踰時卒將軍魁玉暫攝其
印時大變猝遭人心洶洶江甯知府馮柏年極意拊循訛言乃止未幾柏年以
勞瘁卒蒯德模來代之亦以勤能著績 八月滿洲銘安長樂林天齡主試江

南取中駐防積廣上元夏禮江甯陳兆熙王錫疇楊長年許應奎錢允純魏賡元江浦陳慶榮六合徐佩瑚凡十人 駐老湘軍合字營於雨花山以固省防 改創水師設金陵營於草鞋夾以參將領之 建上元節孝祠於旱西門烏龍潭側江甯節孝祠於雨花山故址 冬閏十月大學士曾國藩來為總督居鹽巡道署時已三涖江南矣官習其政民安其業四境晏然 修半山寺 南門外火飛焰入城延燒高岡里民居布政使梅啟照上城親督洋龍救之乃息 挑築沙洲圩大堰浚北河口及大勝關河皆以防軍供役 修六合南門浮橋 修高淳大小圩工 六合文廟成

十年春正月欽差刑部尚書鄭敦謹奏結張文祥案凌遲之於小教場 濬秦淮河至東水關夏五月龍鬪於高淳之石臼湖 高淳知縣秦曾熙請蠲免湖田虛糧 籌建駐防城兵房調荊州兵補額 設桑棉局於城北妙相菴 鹽巡道孫衣言立勸學官書局以書借願讀者 南城外合字營掘地得肉芝 修冶山下忠貞公祠墓 修曠觀亭 夏四月建湖神廟於後湖蓮萼洲 秋

八月修莫愁湖水榭 冬十一月重建總督署成時政通人和百廢具舉大學士曾國藩裘帶從容閒事游燕登高咏古提唱風雅一時人士稱極盛焉 蔣啟勛來為江甯知府

十一年春二月兩江總督曾國藩卒於任士民巷哭野祭如喪私親凡所游歷之處皆繪像以祀紳耆建民不能忘坊於石城門外蚵蛟磯 何璟來署兩江總督俄即真 江甯府學文廟始習樂舞 建將軍都統織造署 設製造火藥局於通濟門外九龍橋 設木釐局於上新河地舊有清遠樓燬於賊重修之署額曰雄冠江東 建雨花山方公祠及木末軒 冬建曾文正公國藩祠於清涼山麓故四松菴址也

十二年春二月何璟以憂去張樹聲來署總督 立永廣學額碑及公車費記於府學明倫堂之左 設修船廠於觀音門外巴斗山 布政使梅啟照籌浚上元句容閒之便民河即石埠橋下水也 夏四月修明孝陵 李宗羲來為兩江總督 六月建 萬壽宮於中正街以祝嘏移文昌宮於西華門 建社

稷壇於南門外三里店神祇壇於雙橋門先農壇於通濟門外 修雨花山麓
 三忠祠以祀宋楊邦乂文天祥明李邦華皆吉水人也 改貢院街道大增平
 江府姚家巷號舍 秋七月建祥忠勇公厚劉武烈公同纓祠於雞鳴山西麓
 八月建馬端敏公新貽祠於龍蟠里 南皮劉有銘安化黃自元主試江南
 取中江甯何延慶六合孫錫第凡二人
 十三年春三月上元知縣莫祥芝江甯知縣甘紹盤修兩縣合志延江甯舉人
 汪士鐸為總纂設局於金沙井城隍廟 立頤壽堂以養老設甘棠文塾以課
 孤童皆江甯知縣甘紹盤所捐建也 建顧亭林先生祠於冶山 設洋務局
 於碑亭巷掌外國使來芻餼燕勞之禮 臺灣有日本警總督李宗義設籌防
 局以綜治軍事增募勇營駐江甯四郭門外建礮臺於烏龍山沙洲圩分設火
 藥局於雞鳴山陰 冬兩縣志告成上元知縣沈國翰復序之 十二月移城
 隍廟於江甯府署北舊址以金沙井遺基分前為向張二忠武公榮祠後為
 崇善堂恤嫠局

德宗景皇帝光緒元年春 詔蠲賚一切如道光咸豐元年例 劉坤一來為
 兩江總督 浚城南北各街道水溝 秋八月臨桂周桂清南鄭王炳主試江
 甯取中駐防懷他佈文瑞上元蔣師軾劉汝霖江甯陳作霖鄧嘉縝謝霖六合
 汪達鈞凡八人 冬沈葆楨來為兩江總督改試武弁月課以洋鎗打靶 江
 甯七屬始開辦大徵 溧水丁漕減成徵收次年亦如之 勒方錡來署江甯
 布政使
 二年重造駐防城內響水馬家白虎小平教場中路各橋及浚小門前各水溝
 修浚金陵閘雙塘重造長干橋 修浦口敵臺 衛榮光來為江甯布政使
 夏早有星晝見 秋八月仁和龔自閔漢軍邊寶泉主試江南取中駐防承
 蔭錦山上元丁自求江甯甘元煥溧水朱紹頤朱紹亭凡六人
 三年春立蒼聖祠於冶山飛雲閣以史籀王次仲史游許慎配祀 重建中和
 橋 夏旱蝗食蘆葦 孫衣言來為江甯布政使 濬城內河道挑後湖築隄
 以達湖神廟皆以工代賑也 立捕蝗局竣事而徹 秋 詔減元甯句浦六

五縣漕糧十分之三 籌積穀廣爲勸捐溧水知縣傅觀光建常平倉 總督
沈葆楨調江浦防軍開朱家山河 冬十月溧水文廟成 六合知縣謝延
修四門城樓及城河橋

四年春捕蝗子 詔免高淳沈田攤帶虛糧仍照六升六合起科 夏句容旱
蝗建入蜡廟於西門外 總督沈葆楨奏請豁除江淮興武二衛快籍編審
立廣豐備倉於羅寺轉灣儲民捐積穀以紳士掌之 高淳立禁漁筏碑於花
津護駕墩 建江東橋 修六合通江集圩堰溶江浦扁擔河

五年春建甘棠文塾於華藏菴以爲孤童課文之所 建鍾山書院享堂以祀
山長之有德望者 重建一拂清忠祠以祀宋鄭介公俠地 在清涼山阿林
木極幽秀也 封烏龍山龍神曰靈護重建祈澤寺 秋孫衣言以太僕卿內
召桂嵩慶來署江甯布政使 八月高要馮譽驥仁和許有麟主試江南取中
駐防錫恩上元田晉奎楊文彥江甯姚兆頤劉傳林鄧嘉繩江浦毛鳳五凡七
人 冬署布政使桂嵩慶議浚城內河道 防軍修城外濱江各圩隄及六合

犁團兩埂 盧士杰來爲江甯布政使 總督沈葆楨病篤請以候補道洪汝
奎代拆代行未幾卒於任吳元炳來攝之 高淳建遺愛祠於賓陽門外 六
合重建龍津橋句容修上葛村西橋

六年春劉坤一重來爲兩江總督 建沈文肅公葆楨祠於龍蟠里 築薛廬
於烏龍潭上並建宛在亭於湖心本肥月亭故址也 創建勞勞亭於石城門
外 句容知縣袁照逐茅山道士封山禁香客神印貯庫 建龍神祠於寶華
山 夏梁照煌來爲江甯布政使 江甯知府蔣啟勳續修府志延舉人汪士
鐸爲總纂未成升任去後政趙佑宸踵成之 秋不雨 句容文廟成 恩免
溧水湖坍浮糧 俄羅斯有違言防軍應調北去朱家山河工暫罷 始設電
綫局於南城外 六合修三鋪堡培土疏溝設斗門築圩埂

七年春重修礮臺增築下關數處 重建石城橋 創諸葛祠於蛇山靈應觀
中以地近駐馬坡也又附祀陶淵明於祠側 移鍾山書院於錢廠橋故址
冬恪靖侯左宗棠來爲兩江總督以城中荒涼擬大築屋宇先設清丈局以理

地基

八年春設水利局挑江浦朱家山河開句容赤山湖河建東水關外石閘
陶文毅公澍林文忠公則徐祠於督院東 秋八月仁和許庚身南海譚宗
主試江南取中駐防秉彝上元陸春官仇繼恆朱連捷江甯鄭維翰王慶生朱
培元六合孫錫恩孫榮綬凡九人 紳士謀命年續籌公車費總督左宗棠復
捐益之共銀萬兩

九年春恆雨 建方正學祠於駐防城殉節處其血蹟石以亭覆之 秋大風
敗稼 冬天有赤氣隨日出沒者累月

十年春修通濟門外九龍橋及城內利涉橋內橋 威毅伯曾國荃來為兩江
總督入城日居民感其復城功夾道焚香以迎 立明卓忠毅公敬祠於雨花
臺木末軒 夏總督曾國荃以全權大臣赴上海與法夷議無事不成遂歸江
甯辦理防務使提督劉連捷召募湘勇屯於鼓樓北以次進防 舉行七屬保
甲 秋七月福建舟師敗績於馬江法船有犯長江之謠金陵大震有徙家避

兵者 九月雪

十一年春二月中法和議成江防始罷警 是月杪大雨連日夜山水泛溢圩
田淹沒低窪街道皆上水 秋八月安邱馮爾昌平阿戴彬元主試江南取中
駐防秉堃上元孫啟泰吳鑑三張文江江甯金還王光第陳光紳葛增祥王宗
喬江浦葛繩正六合馬聯芳凡十一人 冬十月丙戌夜有流星交織四下如
雨如是者三日 美英二國各立耶穌教堂於旱西門內四根桿子未幾美國
又立醫院於城北乾河沿 城中屢有火警

十二年春江甯知府孫雲錦始設奎光書院以課童生詩賦 時放火行劫者
屢見經江甯知縣陸元鼎懲之乃稍止 秋九月天有聲如水流數日 冬十
二月大雪經月折木壞屋平地深五尺 是年梁照煌乞病去田國俊來署江
甯布政使

十三年春正月山水發衝圯東水關外石閘 庚戌夜大霧四塞如烟中有硫
磺氣 恆雨 許振禕來為江甯布政使 夏四月黑廊大火 秋八月沈陰

不雨經月 總督曾國荃將入覲會匪楊子吉欲乘隙爲亂捕得誅之國荃至清江浦奉 旨回任 冬旱屢有火警 布政使許振禕與江甯知府李廷簫議毀通濟門外石閘修大中橋濬東關河 十二月晦湖南流民求撫恤圍總督署鼓譟中軍副將調兵捕獲數人始散 是歲籌優拔貢入京盤費勒石於縣學前

十四年夏旱 五月訛言剪雞毛 秋七月太常仙蠅至貢院 八月順德李文田閩縣王仁堪主試江南取中駐防承恩存慶上元宗舜年濮人驥江甯陳光宇葉文詮侯巽陳作儀鄭思惠鄭師灼顧賜儒溧水濮賢慶六合張遐齡凡十三人 冬振 布政使許振禕爲火災故築北極閣增修曠觀亭以其西爲陶貞白祠又起洪武鐘之臥者建鐵柱亭懸之復於莫愁湖心創曾公閣中正街立文正書院土木並興江山增藻繪焉 建左文襄公宗棠祠於一拂祠側劉公連捷祠於盧妃巷福珠洪阿公祠於雞鳴山下 十五年春正月有狼入城捕之不得 二月乙酉雨雪木介 夏五月旱 秋

八月雨潦城中低處皆上水 安邱李端遇濰縣曹鴻勛主試江南取中駐防達他布根煜上元周潤章伍元芝馬志舉陸維炳黃宗澤金永發張家驥夏仁溥江甯許長麟秦匯生蔡敦益袁國興吳鳴麒凡十五人 十六年春正月有狼入城獲諸南宮坊 馮應壽署布政使 恆雨 三月始課文正書院以一時藝一賦一七排爲程 秋瑞璋來爲布政使 九月龍江關創設義渡江船水手鬪 十月總督曾國荃卒於任安徽巡撫沈秉成來署城中屢火殺人 江輪名上海者被焚於龍潭口死者無算 十一月李桃繡毬及菜花皆開 墁水西門大街至行口石路并通官溝 十七年春正月飭修城 墁倉巷大街 三月俄酋子過境 劉坤一三來爲兩江總督 訛言將焚教堂撥兵護之 夏旱閉南門祈雨 朝陽洞發蛟水 秋蝗 八月仁和金保泰德化李盛鐸主試江南取中駐防承厚長培上元朱應杓顧祖彭江甯魏家驊程先甲沈厚圻葉文翰鄧嘉禾鄧邦述鄧邦達凡十一人 建曾忠襄公祠於盧妃巷 冬桃杏華 是年城中屢火殺人

十八年夏旱 修城堞起十三門城樓調官弁駐之 秋飛蝗蔽天江甯府屬皆荒句容尤甚 挑城中河道 冬奇寒城外內河皆凍十日不解

十九年秋鄉中多疫 八月陰雨傷稼 諸城徐會豐南昌文廷式主試江南取中駐防鳳葆上元周鉞蔣嘉淦劉文炳王孝達黃申錫羅運經汪家聲江甯程榮江維垣張恪勳葉廷琦高澹王嘉賓六合唐毓林凡十四人 開東水關濬城中河道 冬旱

二十年春重造利涉橋成 瑞璋入覲巡道胡家楨署布政使旋回任 夏大旱奇熱 秋城鄉多疫死喪甚眾 八月烏程馮文蔚瑞安黃紹第主試江南取中上元劉廷弼蕭元怡江甯夏仁瑞夏慶徽六合姜崇德凡五人 日本侵朝鮮擾東三省總督劉坤一奉 命北征南皮張之洞來署 設籌餉捐局 二十一年春布政使瑞璋入京祝 嘏巡道胡家楨再署旋回任 息借商捐開官銀號 二月大雷雨二日奇寒又大雪三月雷雨雪同時並集 夏四月日本和議成金陵解嚴遣撤各防營招新勇練地營習洋操 開商務局 創

築馬車路自碑亭巷出儀鳳門造鐵橋於下關以通洋棚徧城行東洋車 夏秋大疫死喪者比戶 九月大雪奇寒 冬錢價騰貴歲暮通城罷市 設水師學堂於儀鳳門

二十二年春正月總督劉坤一回任 二月上元知縣王芝蘭設四仲課以試諸生 三月積陰彌月 自強軍洋教習因爭操場為練軍所傷移屯上海造新馬車大路自碑亭巷接至通濟門 各鄉開礦 設陸師學堂於三牌樓 布政使瑞璋被劾去桂嵩慶暫署以嵩壽代之 設儲才館以舊同文館擴充之 冬連雨無雪

二十三年春正月晴日中飛雪 二月淫霖彌旬間作雷雹久寒不溫 署江甯知府柯逢時考醫士推廣愛育堂醫局 部文節餉裁兵勇四成 夏六月大風吹貢院牌扁落地 大水文廟前及低窪處皆漫溢 秋六合浮橋壞溺死多人 開鑄銀元銅錢局於下浮橋 八月吳橋劉恩溥海甯朱錫恩主試江南取中駐防札拉芬上元孫啟椿侯必昌郭廷熙陳蔭桐江甯楊炎昌翁長

蔡王恩綸溧水鄭咸江浦謝則陳凡十人 冬温無冰 創辦郵政局
二十四年春正月乙酉朔日食雲陰不見 二月連陰大雪奇寒流民凍死無
數官紳舉行義振 翠微亭火清涼山營官重修之 自三月以後米價踊貴
至五月每石七千文饑民糾眾劫米店自北而南各業罷市經官紳彈壓搜屯
戶設五城平糶局乃止 蠲米捐禁米商出洋 詔行新政廢時文改試策論
創辦高等學堂以儲才學堂改爲之在陸師學堂側 秋七月天作黃金色
布政使嵩壽升任去以胡家楨暫署 八月罷新政學使瞿鴻機按試江甯
童場奉復時文之 諭卽於是日以四書命題 山圩田大熟 十一月彗星
見
二十五年春創辦四鄉團練 展馬車路至龍王廟 修石城橋文德橋 夏
欽差大學士剛毅來 高等學堂罷改爲格致書院 恩壽來爲布政使 開
金陵新關於龍江以巡道領之 冬雨雪連綿兩月 總督劉坤一入 覲以
鹿傳霖攝之 馬車路旁徧栽楊柳以蔽行人

二十六年夏劉坤一回總督任 拳匪起畿輔以仇教爲名長江一帶與洋人
立約代爲保護民賴以無恐 街市各鋪辦商團 夏秋小旱 以京師亂停
江南庚子科鄉試 九月大雷雨馬鞍山火藥局災死者數十人吉林菴全燬
二十七年春二月江水清五日 是月黃霾大風四日 增築馬車路於貢院
大功坊內橋 夏四月麥大熟 五月大雨五日寒如深秋江水陡漲城中低
處水及半扉秦淮兩岸皆沒舟行陸地瀕江圩皆破提督楊金龍冒雨救護散
貧民被水者饘餅 六月米價陡貴設三城平糶局 秋旱 開江鄂編譯官
書局於鍾山書院 廢鍾山惜陰文正奎光四書院留尊經鳳池改名校士館
恩壽升漕運總督以巡道徐樹鈞攝布政使 開辦市房烟膏捐設局於行
臺 冬旱無冰 吳重憲來爲布政使 關道開師範學堂於毘盧寺
二十八年春二月江水清 三月開課吏館 夏五月開濟兵輪炸裂於龍江
中流全船皆燬 米踊貴設平糶局於城隍廟 布政使吳重憲調任去以李
有棻代之 秋小旱蝗蝻生 八月狀元境大火 戴鴻慈黃鈞隆主試江南

取中駐防延昌果晟甘福紹先上元郭後德黃宗幹王相衡顧孝珣莊佑志竇
昉夏仁虎王光燮張修祜蔣汝正江甯馬繼恩沈葆蔭陳祖麻任學文王家錦
楊熙昌陸維李周漢姚佩珩隨勤恪張汝芹童廣祺溧水寶恩榮六合王乃屏
朱逢咸汪昇遠凡三十人 九月總督劉坤一卒於任以李有棻護印冬十月
張之洞來署總督大譙洋人於水師學堂 十二月開府學堂於文正書院縣
學堂於惜陰書院 金陵新關前地陷數十丈傷人無算 評事街火焚死七
人 辛未晝大霧不見日光 設學務處於高井大街 修明孝陵圍牆及享
殿

二十九年春正月日出入時赤氣亘天 展中正街至旱西門馬車路 下關
地復陷入江數丈 二月魏光燾來蒞總督任 開三江師範學堂於江甯府
署 四月開高等學堂於鍾山書院 開裕甯官錢局於評事街 六月黃士
筦來為布政使 八月楊佩璋紹昌主試江南取中駐防承惠上元楊大銓顧
厚輝劉文煜管祖貽王守誠江甯王孝燧陳澤于本埭陶隆傑秦寶瑤六合姜

崇恩凡十二人 秋大有年 開南洋官報局 設將弁學堂於昭忠祠
三十年春正月牙巷火殺一家十人 三月高等學堂圖書堂圯斃一人傷
七人 兩湖總督張之洞來會議機事 裁江甯織造缺 夏接旱西門城坡
馬路 秋魏光燾調任去李興銳來署總督九月卒於任 欽差鐵良來 端
方來署總督 與商會立議員 移三江師範學堂於北極山下 冬十月
皇太后萬壽聖節宴中外官紳於三江師範學堂 派各學生出東西洋端方
餞之於高等學堂 是月周馥來為總督端方回本任 改格致書院為農工
商礦實業學堂 城中蒙學堂有思益幼幼養正謙益四所又議開四十所分
為四區 大有年 十二月煖如初春旋大雷電暴雨經兩時許越十日雨雪
嚴寒

三十一年春二月山水暴發下關壞船無數 南城崩傷人 設師範傳習所
於貢院 恆寒多雨 設督練所於奇望街 夏酷暑異常 秋江潮泛溢
開甯學會於明德堂後改學務公所自是各會演說多在縣學中 設拚音學

通志卷四
堂於毘盧寺 改保甲為警察設跔岡巡士 布政使黃士筦罷去以恩銘代之

三十二年春移商務局於復成橋內設商務學堂及商品陳列所 以公車款設公立學堂於明德堂 設江甯提學使司與蘇屬分治 三月布政使恩銘升任以朱恩紱署理 夏五月恆雨低處皆水 米價大貴官設平糶局 繼昌來為布政使 周馥調任去端方來為總督 徵兵與警察闕誅二人 合城疫 大操於東郊與京江兵合演 冬十一月雷 振江南北被水災民改傳習所為師範學堂設於北極山下 是年女學堂有毓秀及旅甯第一第二等名

三十三年舉貢會考用小京官知縣生員會考用巡檢典史皆以提學使陳伯陶主試 江甯府設小學堂於署傍箭道名崇文 改簡字學堂 卽拼音為江甯小學舊有元甯學堂改為上元 爪哇國有遣子弟來學者設暨南學堂於妙相菴以教之 甯滬鐵路開至下關姚坊門一帶又開金川門支路入城

造龍江鐵橋疏寶塢橋水道開四汊河 冬十月總督端方飭各學堂舉行運動會 設江甯府自治局於七家灣 將設圖書館購浙江丁氏書籍以實之 三十四年春寒多沈陰 二月提督姜桂題率京兵防江駐浦子口 夏淫雨江河水漲 六月酷旱六旬至秋八月始解 布政使繼昌升任去以提學使陳伯陶署理九月樊增祥始履任 甯藩開辦諮議局籌議所 開戒烟所於中正街禁止城中烟社及四鄉罌粟花田

國朝金陵通紀卷四

宣統元年校刊

金陵通紀補

宣統元年各縣投票選舉議員 築公園開辦勸業會 夏四月旱五月淫雨
 街衢低處皆上水六月酷暑 總督端方調北洋以布政使樊增祥署任未幾
 張人駿自廣東來履任 新開豐潤門於神策太平二門之間以通後湖 八
 月洵貝勒薩提督考察海軍過甯 諮議局成立開會四十日 設出品勸業
 會於城隍廟 十一月雷雨
 二年正月移出品會於韜園 二月大雷雨三日旋大雪平地尺餘奇寒饑民
 劫米 改編譯官書局為江蘇通志局 四城設平糶局 四月開南洋勸業
 大會 長星見 六月大雨雷電以風勸業會茶社及動物院屋圯壓傷多人
 死一人 除夕大雷雨
 三年寶善源和大銀行倒商務大震銀錢皆荒 夏秋之交大雨連日江水並
 漲城中大半上水行路不通 八月革命軍起義於湖北武昌遠近皆響應十
 月聯軍攻金陵總督以下皆棄城走金陵遂歸民國焉

壬子年補刊
 大興自開東平...
 六月...
 七月...
 八月...
 九月...
 十月...
 十一月...
 十二月...

壬子年補刊

